

摘藻堂四庫全書薈要

集部

欽定四庫全書薈要

集部

施註蘇詩卷三十一

二



詳校官助教臣常循

欽定四庫全書薈要卷一萬四千九百八十二

集部

施註蘇詩卷三十一

宋 蘇軾 撰

宋 施元之 註

武進邵長蘅刪補

詩三十九首

時守潁州作

葉待制求先墳永慕亭詩

葉待制名康直字景溫建州人擢進士第

知光化縣其政務便民以治績顯歷秦鳳陝西
轉運饒涇原師知秦州夏人寇甘谷景溫戒諸
將設伏以待殲其二酋自直龍圖閣進待制
陝西都轉運使請亳州召為兵部侍郎卒

靈區有異產化國無潛珍承平百年間簪纓半齊民建
谿富奇偉葉氏初隱淪森然見喬木其下維德人佳哉
鬱蔥蔥氣若鳳與麟聯翩出儒將豈惟十朱輪新松無
鹿觸舊柏有烏馴待公歸上冢淚葉乃肯春

漢賈誼傳襲九淵之神龍兮沕淵潛以自珍楊惲傳家
方隆盛時乘朱輪者十人晉許孜傳二親沒孜宿墓所
列植松柏時有鹿犯其松栽孜悲歎之明日鹿為猛獸
所殺置於栽下自後樹木滋茂而無犯者唐褚无量傳
廬母墓左鹿犯所植松柏无量號訴曰山林不乏忍犯
吾塋樹耶自是羣鹿馴擾北史蕭放傳字希逸居喪廬
前有二慈烏各集一樹為巢馴庭飲啄每到臨時舒翼
悲鳴有似助哀也放與无量二事竝互見廿一卷思成

堂詩晉王東傳廬父墓側常攀柏悲號涕淚著樹樹
為之枯孟郊古薄命妾行青山有靡蕪淚葉長不乾

與趙陳同過歐陽叔弼新治小齋戲作

江湖渺故國風雨傾舊廬東來三十年媿此一束書尺

椽亦何有而我常客居羨君開此室容膝真有餘拊牀

琴動搖弄筆牕明虛後夜龍作雨天明雪填渠

公自注時方禱

雨龍祠作此句時星斗粲然四更風雨大至明日乃雪

夢回聞剝啄誰乎

一作呼

趙

陳予添丁走沽酒通德起挽蔬主孟當啗我玉鱗金尾

魚一醉忘其家此身自蘧篲

韓退之示記詩始我來京師止攜一束書辛勤三十年
以有此屋廬此屋豈為華於我自有餘道德伶玄之妾
樊通德也已見國語施優謂里克曰主孟昭我注云大
夫之妻從夫稱主而孟則里克妻字也遷蘇廡竹席已
見先生詩話元祐六年十月二十六日禱雨張龍公會
景妃廡常二歐陽子作詩云夢回聞剝啄誰乎趙陳子
景妃拊掌曰句法甚新前人未有此法季默曰有
之長官請客吏請客目曰主簿少府我即此語也

聚星堂雪

并引

元祐六年十一月一日禱雨張龍公得小雪與客
會飲聚星堂忽憶歐陽文忠公作守時雪中約客
賦詩禁體物語於艱難中特出奇麗爾來四十餘

年莫有繼者僕以老門生繼公後雖不足追配先生而賓客之美殆不減當時公之二子又適在郡故輒舉前令各賦一篇

廬陵集載雪詩注云時在潁州作其序曰玉月梨梅

練絮白舞鵝鶴銀等字皆請勿用

牕前暗響鳴枯葉龍公試手行初雪暎空先集疑有無作態斜飛正愁絕衆賓起舞風竹亂老守先醉霜松折恨無翠袖點橫斜祇有微燈照明滅歸來尚喜更鼓暗晨起不待鈴索掣未嫌長夜作衣稜卻怕初陽生眼顯

欲浮大白追餘賞幸有回飈驚落屑糝糊檜頂獨多時
歷亂瓦溝裁一瞥汝南先賢有故事醉翁詩話誰續說
當時號令君聽取白戰不許持寸鐵

歐陽叔弼見訪誦陶淵明事歎其絕識既去感
慨不已而賦此詩

淵明求縣令本緣食不足東帶向督郵小屈未為辱翻
然賦歸去豈不念窮獨重以五斗米折腰營口腹云何
元相國萬鍾不滿欲胡椒鉢兩多安用八百斛以此殺

其身何翅抵鵲王往者不可悔吾其反自燭

唐元載傳為相聚斂無涯賜死後籍其家胡椒至八百石他物稱是鹽鐵論崑山之旁以玉抵烏鵲

喜劉景文至

天明小兒更

平聲

傳呼髯劉已到城南隅尺書真是髯手

迹起坐熨眼知有無今人不作古人事今世有此古丈
夫我聞其來喜欲舞病自能起不用扶江淮旱久塵土
惡朝來清雨濯鬚鬚相看握手兩無事千里一笑無乃
迂平生所樂在吳會老死欲葬杭與蘇過江西來二百

日冷落山水愁吳姝新堤舊井各無恙參寥六一豈念
吾別後新詩巧摹寫袖中知有錢塘湖

新堤謂所築蘇公堤舊井謂所治唐六井參寥六一
二泉名先生有參寥泉銘又有六一泉銘皆杭州事

禱雨張龍公既應劉景文有詩次韻

張公晚為龍抑自龍中來伊昔風雲會吐嗟潭洞開精
誠苟可貫賓主真相陪洞簫振羽舞白酒浮雲壘言從
關州妃遠去焦氏臺傾倒鉗中雨一洗麥上埃破旱不
論功乘雲卻空回嗟龍與我輩用意豈遠哉使君今子

義英風冠東萊笑說龍為友幽明莫相猜

歐陽公集占跋尾張龍公碑唐趙耕撰有云公常釣於焦氏臺之陰夫人關州石氏又詳本卷次韻陳履常張公龍潭詩注見後漢書洞簫注云簫之無底者周禮凡舞有帔舞有羽舞又再獻用兩山尊皆有壘鄭氏注山壘刻畫為山雲之形三國志吳太史慈字子義東萊黃人也最有膽烈

劉景文家藏樂天身心問答三首戲書一絕其
後

淵明形神自我樂天身心相物而今月下三人他日當
成幾佛

陶淵明有形贈影影答形神釋三首序云貴賤賢愚莫不營營以惜生斯甚惑焉故極陳形影之苦言神辨自然以釋之好事君子共取其心焉白樂天有心問身身報心心重答身三絕句題云閑卧獨吟無人酬和聊假身心相戲復馬南史孟顓事佛精懇而為謝靈運所輕嘗謂顓曰得道應須慧業丈人生天在靈運前成佛當在靈運後再見

西湖戲作

王注杭顓皆有西湖先生連守二州其到顓有謝執政啟云八參兩禁用

玷北扉之榮出典二邦輒為西湖之長

一士千金未易償我從陳趙兩歐陽舉鞭拍手笑山簡
祇有并州一葛強

晉山簡傳兒童歌之曰舉鞭向葛彊何如
并州兒彊家在并州簡愛將也又互見前

送歐陽季默赴闕

先生豈止一懷祖郎君不減王文度膝上幾日今白須
令我眼中見此父汝南相從三晦朔君去苦早我來暮
霜風淒緊正脫木潁水清淺可立鷺莫辭白酒瀉香泉
已覺扁舟掠新渡坐看士衡執別手更遣夢得出奇句
郎君可是筦庫人乃使騷驥隨蹇步置之行矣無足道
賢愚豈在遇不遇

晉王述傳字懷祖愛其子坦之雖長大猶抱膝上王坦之傳字文度時人語曰江東獨步王文度王羲之常謂諸子曰吾不減懷祖而位過懸邈當由汝等不及坦之故耶並再見晉陸機字士衡弟字士龍唐劉禹錫字夢得按時季默兄叔弼及劉景文在穎故有坐看士衡之句禮記趙文子之於晉國舉莞庫者七十餘家杜子美錦樹行天驕跛足隨羸牛

用前韻作雪詩留景文

萬松嶺上黃千葉載酒年年踏松雪劉郎去後誰復來
花下有人心斷絕東齋夜坐搜雪句兩手龜拆霜須折
無情豈亦畏嘲弄穿簾入戶吹燈滅紛紛兒女爭相似

碧海長鯨君未掣朝來雲漢接天流顧我小詩如點纈
歐陽趙陳在戶外急掃中庭鋪木屑交遊雖似雪柏堅
聚散行作風花瞥晴光融作一尺泥歸有何事真無說
泥乾路穩放君去莫倚馬蹠如踏鐵

莊子不龜手注其藥能令手不龜拆已見白樂天與元
九書梁陳間率不過嘲風雪弄花草而已杜子美詩未
掣鯨魚碧海中晉陶侃傳鎮武昌時造船木屑及竹頭
悉令舉掌之咸不解後正會積雪始晴聽事前餘雪猶
濕于是以屑布地杜子美驄馬行腕
促蹠高如踏鐵交河幾蹴層冰裂

和劉景文見贈

元龍本志陋曹吳豪氣崢嶸老不除失路今為噲等伍
作詩猶似建安初西來為我風顰面獨卧無人雪縞廬
留子非為十日飲要令安世誦亡書

三國志元龍湖海之士豪氣不除詳已見前漢韓信傳
嘗過樊噲噲曰大王乃肯臨臣信出笑曰生乃與噲等
為伍建安後漢末年號魏文帝典論曰今之文人魯國
孔融文舉廣陵陳琳孔璋山陽王粲仲宣北海徐幹偉
長陳留阮瑀元瑜汝南應瑒德璉東平劉楨公幹此七
子皆在建安時也韓退之薦士詩五言出漢時蘇李首
更號東都漸瀾漫派別百川導建安能者七卓犖變風
操列子黃帝篇商丘開平老力弱面目黧黑史記范雎
傳秦昭王遣平原君書曰君幸過寡人願與君為十日
之飲漢張安世傳上行幸河東亡書三篋詔問莫能知

唯安世識之具述其事後購求得書以相校無所遺失

和劉景文雪

占雨又得雪龜寧欺我哉似知吾輩喜故及醉中來童

子愁冰硯佳人苦膠

去聲

杯那堪李常侍入蔡夜銜枚

左傳昭二十五年臧昭伯如晉臧會竊其實龜偃句以卜偕吉曰偃句不吾欺也杜預注偃句龜所出地名王注膠字去聲與白樂天一碟膠牙餠之膠同膠杯雖出莊子置杯焉則膠而此所謂膠杯乃是酒凍也唐李愬傳討吳元濟夜半冒雪入駐元濟外宅周禮大司馬篇銜枚而進注枚如箸銜之軍法以止語

次前韻送劉景文

白雲在天不可呼明月豈肯留庭隅怪君西行八百里
清坐十日一事無路人不識呼尚書但見凜凜雄千夫

公自注君一馬兩僕率然相訪
逆旅多呼尚書意謂君都頭也豈知入骨愛詩酒醉倒

正欲蛾眉扶一篇向人寫肝肺四海知我霜鬢須公自注君

前有詩見寄云四海共知
霜鬢滿重陽曾插菊花無歐陽趙陳皆我有豈謂夫子

駕復迂邇來又見三黜柳共此暖熱餐羶蘇酒肴酸薄

紅粉暗祇有潁水清而妹一朝寂寞風雨散對影誰念

月與吾公自注郡中日與歐陽叔弼趙景貺陳履常相
從而景文復至不數日柳戒之亦見過賓客之

盛頃所未有然又數日
叔弼景文戒之皆去矣
何時歸帆泝江水春酒一變甘

崇湖

公自注景文近卜
居九江近甘崇湖

仙傳拾遺穆王觴西王母於瑤池上王母謠曰白雲在
天山陵月出道里悠遠山川間之唐袁滋傳與之接者
皆目謂可見肺肝白樂天對酒詩賴有酒仙相暖熱餐
糧用漢蘇武事庾信出橫門詩明朝風雨散何處更相
尋

以屏山贈歐陽叔弼

漫郎天骨清生與世俗異學道新有得為貧聊復仕每
於紅塵中嘗起青霞志屏山輟贈子莫遣污簪珥寓目

紫翠間安眠本非睡夢中化為鶴飛入長松寺

漫郎用元結傳語屢見江文通恨賦鬱青霞之奇意杜牧之詩千峰橫紫翠遺教經睡蛇既出乃可安眠

新渡寺席上次趙景貺陳履常韻送歐陽叔弼
比來諸君唱和叔弼但袖手旁睨而已臨別忽
出一篇頗有淵明風致坐皆驚歎

神屠不目全妙額惟妝半更刀乃族庖倚市必醜悍平
生魏公籌忽斲郢人墁詩書亦何用適道須此館多言
雖數窮微中或排難子詩如清風琴琴

六反收

發將旦胡

為久閉匿綺語真自患許時笑我癡隔屋相詠歎竟識
彥道不絕叫呼百萬清朝固多士人門子皆冠莫言清
潁水從此隔河漢異時我獨來得魚楊柳貫持歸不忍
食尺素解淒斷中有清圓句銅丸飛柘彈春愁結凌漸
正待一笑泮百篇儻寄我呻吟鄭人緩

莊子養生主庖丁謂文惠君曰始臣解牛之時所見無
非牛者三年之後未嘗見全牛也又良庖歲更刀割也
族庖月更刀折也孫綽天台賦投刃皆虛目牛無全後
漢馬廖上疏長樂宮云長安語曰城中好廣眉四方且
半額城中好大袖四方全足帛見馬援傳南史梁元帝
徐妃以帝眇一目每知帝將至必為半面妝以俟焉

舒傳為鍾毓長史毓與參佐射舒嘗為畫籌而已後過
朋人不足以舒滿數舒發無不中毓謝而歎曰吾之不
足以盡鄉村有如此射豈一事哉莊子徐無鬼郢人墮
漫其鼻端若蠅翼使匠石斲之注再見史記滑稽傳談
言微中亦可以解紛魯仲連傳為人排患釋難陳後主
詩見面無多事聞名爾許時晉顧愷之傳與謝瞻連省
夜於月下長詠瞻每遙贊之愷之彌自力瞻將眠令人
代已愷之不覺有異俗傳愷之癡絕晉袁耽傳字彥道
就局十萬一擲直上百萬投馬絕叫曰竟識袁彥道不
詳見六卷會客有美堂詩注南史蔡凝傳上謂凝曰我
欲用義興主壻錢肅為黃門郎卿意如何凝曰黃散之
職故須人門魚美惟陛下察之唐史李揆傳肅宗謂揆
曰卿門地人物文學皆當世第一石鼓文其魚維何維
鯁維鯉何以貫之維楊與柳西京雜記長安五陵人以
柘木為彈真珠為丸以彈鳥鵲南史王筠傳好詩圓美
流轉如彈丸再見莊子列禦寇鄭人緩也呻吟裘氏之

地祇三年
而緩為儒

次韻趙景貺春思且懷吳越山水

歲華來無窮老眼久矣靜春風如繫馬未動意先騁西
湖忽破碎鳥落魚動鏡縈城理枯瀆放聞起膠艇願君

營此樂官事何時竟

公自注清河西湖
三閘督君成之

思吳信偶然出

處付前定飄然不繫舟乘此無盡興醉翁行樂處草木
皆可敬明朝游北渚急掃黃葉徑白酒真到齊紅裙已

放鄭

公自注酒尚有香泉一壺
為樂全先生服不作樂也

莊子列禦寇汎若不繫之舟虛而遨遊者也到齊用世說青州從事語青州有齊郡從事謂到臍下也注再見

次韻陳履常張公龍潭

先生以十月二十五日禱雨迎龍公祝辭云謹

請州學教授陳師道并遣男右承務郎迨既禱而獲十一月十日祝辭云玉質金相其重千鈞忠然肯來負者四人春此行宮為留浹辰惟師道迨復餞公還履常為教授屬以送迎龍公蛻骨故詩云念子無吏責十日勤征鞍云云

經明宣城宰家此百尺瀾鄭翁不量力敢以非意干玄黃雜兩戰絳青表雙蟠烈氣斃強敵仁心惻飢寒精誠禱必赴苟簡求亦難蕭條麥麴枯浩蕩日月寬念子無

吏責十日勤征鞍春蔬得雨雪少助先生槃龍不憚往
來而我獨宴安閉閣默自責神交清夜闌

唐趙耕撰張龍公廟碑公諱路斯隋末明經登第為宣
城令罷歸每夕出自戌至丑歸常體冷且濕夫人石氏
異而詢之公曰吾龍也蓼人鄭祥亦龍也據吾池吾屢
戰未勝明日取決可令九子挾弓矢射之繫鬣以青綃
者鄭也絳綃者吾也子遂射中青綃鄭怒求北去投合
肥西山以死公是夕與九子俱復為龍漢韓延壽傳守
左馮翊高陵民有兄弟訟田延壽傷之閉閣思過後漢
吳祐傳為酒泉太守民有爭訟輒閉閣自責然後斷其
訟

小飲西湖懷歐陽叔弼李默呈趙景貺陳履常



集本作竹間亭小酌公真迹刻于發倅廳事
作小飲西湖懷歐陽叔弼兄弟贈趙德麟陳
履常蓋是後來所書
景旼已改字德麟也

歲暮自急景我閒方緩觴歡

一作醉

飲西湖晚步轉北渚

長地坐略少長意行無濶岡久知薺麥青稍喜榆柳黃

盎盎春欲動潏潏夜未央水天鷗鷺靜月霧松檜香撫

景方晚晚懷人重淒涼宜無一老兵坐念兩歐陽我意

正麋鹿君才亦圭璋此會不可再

一作難久恐

此歡不可忘

宋玉九辯白日晚晚其將入兮晉謝奕傳桓溫辟奕司
馬嘗逼溫酒溫走避之奕遂引溫一兵帥共飲曰失一

老兵得一老
兵亦何所怪

蠟梅一首贈趙景貺

天工點酥作梅花此有蠟梅禪老家蜜蜂採花作黃蠟
取蠟為花亦其物天工變化誰得知我亦兒嬉作小詩
君不見萬松嶺上黃千葉玉蘂檀心兩奇絕醉中不覺
渡千山夜聞梅香失醉眠歸來卻夢尋花去夢裏花仙
覓奇句此間風物屬詩人我老不飲當付君君行適吳
我適越笑指西湖作衣鉢

送王竦朝散赴闕

我家衡山公

公自注伯父為衡山日與君相知有送行詩

清而畏人知臧否

不出口默識如著龜擢子拱把中云有驥騄姿胡為三

十載尚作窮苦詞丈人不妄語未效此何疑竭來清潁

上淚濕中郎詩怪我一年長而作十年衰同時幾人在

豈敢怨白髭願言指松柏永與霜雪期

白樂天上瞿中丞詩行為時領袖言作世著龜荀子驂騑驥驥纖離騄耳古之良馬也南史何遜傳言不虛妄每語人云卿能得我一妄語則謝一鱣衆共伺之不能得也中郎言伯父也晉書謝道韞傳云一門叔父則有

阿大
中郎

次韻致政張朝奉仍招晚飲

掃白非黃精輕身豈胡麻怪君仁而壽未覺生有涯曾
經丹化米親授棗如瓜雲蒸作霧楷火滅噀雨已自此

養鉛鼎無窮走河車至今許玉斧猶事萼綠華

公自注
君曾見

永州何仙姑得藥餌之人疑其以此壽
也故有丹化米萼綠華之句皆女仙事

我本三生人疇

昔一念差前生或草聖習氣餘驚蛇儒臞謝赤松佛縛
慚丹霞時時一篇出擾擾四座譁清詩得可驚信美詞

多夸回車入官府治具隨貧家萍蘆與豆粥亦可成吐
嗟

博物志天老謂黃帝曰太陽之草名黃精食之可以長
生太陰之草名鉤吻食之入口即死杜子美丈人山詩
掃除白髮黃精在君看他年冰雪容續齊諧記漢明帝
時劉晨阮肇同入天台採藥乏食見澗中流一杯胡麻
飯云云本草胡麻久服輕身不老神仙傳王方平與麻
姑過蔡經家經弟婦新產姑索少許米擲之墮地即成
丹砂封禪書李少君言上曰嘗見安期生食臣棗大如
瓜後漢張楷性好道術能作五里霧又藥已為尚書正
旦大會巴取酒西南嚶之云成都市失火因酒為雨以
滅之詔以驛書問成都答言時有雨從東北來火乃息
雨皆酒氣仙傳拾遺劉無名有真人示以陽爐陰鼎采
金煉化水玉之方伏汞煉鉛成汞髓之訣以鉛為君以

永為臣八石為使黃牙為田修真祕訣陰真君金液丹
歌云北方正氣為河車陰符經注云河車伏汞也真誥
許翽小名玉斧萼綠華者南山女子顏色絕整以晉昇
平三年降羊權家韋續書訣墨藪鍾繇弟子朱翼每畫
一波三折筆作一戈如百鈞弩作一點如高峰墜石作
一放縱如驚蛇入草法書苑釋亞栖善草書每自題云
飛鳥出林驚蛇入草維摩經貪著禪味是菩薩縛傳燈
錄丹霞禪師遇天大寒取木佛焚之詳見廿六卷次韻
答張天覺詩注杜子美詩語不驚人死不休皇甫湜顛
著作文集序逸歌長句往往若穿天心出月脅意外驚
人語非尋常所能及晉石崇傳為客作豆粥咄嗟而辦
每冬得韭薺蘆王愷密問其帳下云豆至難熟豫作熟
末客來但作白粥投之韭薺
蘆是薺韭根雜以麥苗耳

閻立本職貢圖

譚賓錄貞觀三年東蠻謝元深
入朝中書侍郎顏師古奏言昔

周武王治致太平遠國歸款乃集其事為王會篇可圖寫貽後以彰服遠之德從之乃命

尚書閭立本畫

之為職貢圖

貞觀之德表

一作來

萬邦浩如滄海吞河江音容儵獰服

奇厖橫絕嶺海逾濤瀧珍禽瑰產爭牽扛名王解辮卻
盖幢粉本遺墨開明牕我喟而作心未降魏徵封倫恨
不雙

唐太宗紀即位明年正月改元貞觀劉禹錫竹枝詞激
訐如吳聲儵獰不可分左傳閔二年晉侯使太子申生
伐臯落氏木之厖服杜預曰厖雜色也漢終軍傳殆將
有解辮髮削左衽襲冠帶要衣裳而蒙化者焉唐畫斷

問立德擬職貢圖異方人物詭怪之狀第立本畫國王
粉本昔南北兩朝名手不是過也又云職貢圖國立
本與立德同製之唐魏徵傳帝嘗歎曰今大亂之後其
難治乎徵曰大亂之易治譬飢人之易食也封德彝曰
不然秦任法律漢雜霸道徵書生好虛論徒亂國家不
可聽帝納徵言不疑至是天下大治蠻貊君長襲衣冠
帶刀宿衛東溥海南踰嶺戶闔不閉行旅不齎糧取給
於道帝曰行仁義既效矣惜不令封德彝見之封德彝
倫名

次韻王滁州見寄

斯人何似似春雨歌舞農夫怨行路君看永叔與元之
坎軻一生遭口語兩翁當年鬢未絲玉堂揮翰手如飛

教得滁人解吟詠至今里巷嘲輕肥君家聯翩盡卿相
獨來坐歎谿山上笑捐浮利一雞肋多取清名幾熊掌
丈夫自重貴難售兩翁今與青山久後來太守更風流
要伴前人作詩瘦我倦承明苦求出到處遺蹤尋六一
憑君試與問琅邪許我來游莫難色

歐陽永叔與王元之俱嘗守滁州漢江都易王傳口語
藉藉楊惲傳橫被口語杜子美寄裴十詩知君苦思緣
詩瘦李白嘲杜子美詩為問因何太瘦生只為從前作
詩苦漢嚴助傳詔曰君厭承明之廬勞侍從之事懷故
土出為郡吏歐陽公醉翁亭記環滁皆山也其西南諸
峰林壑尤美望之蔚然而深秀者琅邪也公自號六一

居士

趙景貺以詩求東齋榜銘昨日聞都下寄酒來
戲和其韻分一壺作潤筆也

王孫天麒麟眸子奧而澈囊空學愈富屋陋人更傑我
老書益放筆落座爭掣欲求東齋銘要飲西湖雪長鉗
分未到小硯乾欲裂不似淳于髡一石要燭滅

晉王獻之傳七八歲時學書義之密從後掣其筆不得
歎曰此兒後當有大名北史鄭譔傳復爵沛國公位上
柱國帝令李德林立作詔書高頻戲譔曰筆乾答曰出
為方岳杖策言歸不得一錢何以潤筆淳于髡事屢見

洞庭春色

并引 安定郡王名世準字君平時以保靜軍留後為安定郡王趙德麟

舊字景貺先生著字說為字德麟德麟字見於詩者自此篇始

安定郡王以黃甘釀酒謂之洞庭春色色香味三

絕以餉其猶子德麟德麟以飲予為作此詩醉後

信筆頗有沓拖風氣

法帖評書王子敬書如何洛少年雖自充悅而舉體沓拖

殊不可耐

二年洞庭秋香霧長嘆手今年洞庭春玉色疑非酒賢
王文字飲醉筆龍蛇走既醉念君醒遠餉為我壽餅開

香浮座盞凸光照牖方傾安仁醺莫遣公遠

公自注明皇食

柑凡千餘枚皆闕一瓣問進柑使者云中途嘗有道士覲之蓋羅公遠也

要當立名字未用

問升斗應呼釣詩鉤亦號掃愁帚君知蒲桃惡正是嫫母黥須君灑海杯澆我談天口

潘安仁望賦披黃苞以授甘傾縹瓷以酌醺歐陽公牡丹圖詩洛人矜誇立名字李後主中酒詩莫言滋味惡一簍掃寒愁漢西域傳大宛以蒲萄釀酒列女傳帝妃嫫母於四妃之班居下貌甚醜而最賢史記鄒衍之術迂大而閭辨齊人頌曰談天衍

送路都曹

并序

乖崖公

范蜀公東齋記張詠自蜀代去留一卷實封文字與僧正希白且云十年後開後十

年公薨於陳計至僧發開所留文字乃公畫像自贊曰乖則違衆崖不利物乖崖之名聊以表德因

號乖

崖 在蜀有錄曹參軍老病廢事公責之曰胡不

歸明日參軍求去且以詩留別其略曰秋光都似

官情薄山色不如歸意濃公驚謝之曰吾過矣同

僚有詩人而吾不知因留而慰薦之予幼時聞父

老言恨不問其姓名今都曹路公以小疾求致仕

予誦此語留之不可乃採前人意作詩送之并邀

趙德麟陳履常同賦一篇

積雪困桃李春心誰為容
淮光釀山色先作歸意濃
我亦倦游者君恩繫踈慵
欲留耿介士伴我衰遲蹤
吏課升斗積崎嶇等鉛春
那將露電身坐待收千鍾
結髮空百戰市人看先封
誰能搔白首抱關望夕烽
子意亮已成我言寧復從
恨無乖崖老一洗芥蒂胸
我田荆谿上伏臘亦麤糲
供懷哉江南路會作林下逢

漢江都易王傳宮人有過或髡鉗以鉛杵舂不中程輒掠漢李廣傳結髮與匈奴大小七十餘戰嘗語王朔曰

自漢擊匈奴廣未嘗不在其中而諸部校尉已下材能不及中以軍功取侯者數十人廣不為後人然終無尺寸功以得封邑荆谿在常州宜興縣先生嘗買田於此

次韻陳履常

汝陰久雪人饑公召僉書判官趙德麟令時議所以賑卹之乃發義

倉穀以濟貧乏出作院炭酒務薪用元價以售又秦放積欠教授陳履常師道有詩公和之

可憐擾擾雪中人飢飽終同寓一廬老檜作花真強項
凍鳶儲肉巧謀身忍寒吟詠君堪笑得暖謹呼我未貧
坐聽屐聲知有路擁裘來看玉梅春

後漢董宣傳為洛陽令殺湖陽公主蒼頭主訴於帝帝使宣謝主宣不從彊使頓之兩手據地終不肯謝帝笑敕強項令出

二鮮于君以詩文見寄作詩為謝

二鮮于君乃諫議大夫子

駿之子子駿事見十四卷和邳州新堂月夜詩注

我懷元祐初圭璋滿清班維時南隆老奉使獨未還迂叟向我言青齊歲方艱斯人乃德星遣出虛危間

公自注溫

公謂余曰子駿福星也京東人困甚且令往彼

召用既晚矣天命良復慳一朝

失老驥寂寞空帝閑至今清夜夢枕衾有餘潛喜聞二

三子結髮師閔顏高論邈河漢清詩鳴珮環遙知三日
雪積玉埋崧山誰念此幽桂坐蒙榛與管故人在潁尾
投詩清泠灣

南陸閔中也鮮于子駿閔中人司馬溫公自號迂叟漢
天文志景星德星也地理志齊地虛危之分野莊子吾
驚怖其言若河漢而無極也左傳杜預注潁水之尾在
下蔡又詳本卷新渡寺詩注莊子讓王篇北人無澤自
投于清
泠之淵

次韻趙德麟雪中惜梅且餉柑酒三首

千花未分出梅餘遣雪摧殘計已疎卧聞點滴如秋雨

知是東風為掃除

閨苑千葩映玉宸人間只有此花新飛雲要欲先桃李

散作千林火迫春

火迫字出唐書源休導朱泚僭號姚令言勸泚圍奉天
二人爭自比蕭何休顧令言曰成秦之業無輩我者我
視蕭何子當曹參可矣即收國籍貯
府庫效何者人皆笑謂為火迫都侯

蹀躞嬌黃不受鞿東風暗與色香歸偶逢白墮爭春手

遣入王孫玉笋飛

實子野酒譜河東人劉白墮善釀酒味香美使人久醉
朝士千里相饋號鶴觴亦名騎驢酒永熙中青州刺史

毛鴻賓齋酒之蕃路逢劫盜飲之即醉皆被擒時為之語曰不畏張弓拔刀惟畏白墮春醪洛陽伽藍記亦云

和陳傳道雪中觀燈

陳傳道名師仲履常之兄家居彭城履常在穎傳道

來訪未幾先生移守維揚而傳道亦歸遂和趙德麟韻送之詩載卷末傳道是時仕為

庫

新年樂事歎何曾
閉閣燒香一病僧
未忍便傾澆別酒
且來同看照愁燈
潁魚躍處新亭近
湖雪消時畫舫升
祇恐樽前無此客
清詩還有士龍能

閱世堂詩贈任仲微

任仲微父任師中名伋按秦少游作任師中墓表元

豐中公知瀘州錄使者不法事而使者即誣
奏公西南乞第過江安時不時掩擊乃延儒
生講書疑有私謁朝廷乃下章於他部各窮
竟所考未具而公卒時當途者以公既沒為
使者地公之子大防三詣闕上書陳冤狀獄
不敢變使者竟免大防即仲微也又按師中
嘗為蔡州新息令惠給鰥寡邑人德之遂居
焉堂前有檜高百尺蓋數百年矣直幹蒼然
乃以名其堂故詩云惟有
庭前檜閱世不改色云云

任公鎮西南嘗贈繞朝策當時若盡用善陣無赫赫淒
涼十年後邪正久已白卻留封德彝天意眇難測象賢
真驥種號訴甘百謫豈云報私仇禍福指絡脈高才食

舊德但恐里門窄傷心千騎歸贈印黃壤隔惟有庭前
檜閱世不改色千年與井在記此王粲宅

左傳文十三年晉人患秦之用士會也謀歸之士會行
統朝贈之以策曰子無謂秦無人吾謀適不用也孫子
善用兵者無赫赫之功又善陣者不戰善戰者不敗封
德彝事見本卷職貢圖詩注又杜牧題魏文貞詩可憐
貞觀太平後天且不留封德彝衡按封德彝指當時使
者象賢四語謂大防詣闕訟冤事也漢書于公治閭門
曰少高大令容駟馬高蓋車注閭門里門也
杜子美一室詩應同王粲宅留井峴山前

新渡寺送任仲微

春陰欲落雪野氣方升雲我遊清潁尾想見翠被君古

來聚散地與子復言分倦游安稅駕瘦田失歸耘獨宿
古寺中荒雞亂鳴羣送子以曉角幽幽醒時聞

左傳昭十二年楚子狩于州來次于潁尾使蕩侯潘子
司馬督蹕尹午陵尹喜帥師圍徐以懼吳楚子次于乾
谿以為之援雨雪王皮冠秦復陶翠被豹舄執鞭以出
杜子美贊上人詩古來聚散地宿昔長荆棘史記李斯
傳物極則衰吾未知所稅駕也晉祖逖傳與劉琨同
寢中夜聞荒雞鳴蹴琨覺曰此非惡聲也因起舞

送運判朱朝奉入蜀

建安本云送
朱世昌使蜀

藹藹青城雲娟娟蛾眉月隨我西北來照我光不滅我
在塵土中白雲呼我歸我游江湖上明月濕我衣岷峨

天一方雲月在我側謂是山中人相望了不隔夢尋西

南路默數長短亭似聞嘉陵江跳破吹錦

一作枕

屏送君

無一物清江飲君馬路穿慈竹林父老拜馬下不用驚
走藏使者我友生聽訟如家人細說為汝評若逢山中
友問我歸何日為話腰腳輕猶堪踏泉石

唐地理志蜀州青城縣以青城山名十道曰蕃志嘉州
峨眉兩山相對如峨眉故名韓非子六國時張敏與
高惠為友每相思敏於夢中往尋之至半道迷不知路
而回嘉陵江其源出于大散關嘉陵谷贊寧蜀譜慈竹
筍四時生其竹內實而節疎又蘄黃生一叢數竿根不
外逆茅亭客話慈竹聚生根不離母故名之慈也唐書

陽城為道州刺史以家人法待
吏宜罰者罰之宜賞者賞之

病中夜讀朱博士詩

病眼亂燈火細書數塵沙君詩如秋露淨我空中花古
語多妙寄可識不可誇巧笑在頰頰哀音餘摻過曾坑
一掬春紫餅供千家懸知貴公子醉眼無真茶崎嶇爛
石上得此一寸芽緘封勿浪出湯老客未嘉

圓覺經譬如病目見空中花及第二月後漢禰衡傳為
漁陽摻過擊鼓之法東谿試茶錄佛嶺東南曰曾坑今
屬北苑茶少甘而多苦色亦重濁陸羽茶經上者生
爛石中者生標壤下者生黃土又湯經三沸為老

趙德麟餞飲湖上舟中對月

老守惜春意主人留客情
官餘閒日月湖上好清明
新火發茶乳溫風散粥餚
酒闌紅杏閣日落大堤平
清夜除燈坐孤舟擘岸撐
逮君幘未墮對此月猶橫

蔡邕月令自溫風暑之在風者也玉燭寶典今人寒食日悉為大麥粥研杏仁為酪以餚沃之孫楚祭子推文云黍飯一盤醴酪二盃是其事也宗慄荆楚歲時記亦云晉庾敳傳頽然已醉幘墮几上以頭就穿

贈朱遜之并引

元祐六年九月與朱遜之會議于頽或言洛人善

接花歲出新枝而菊品尤多遜之曰菊當以黃為
正餘可鄙也昔叔向聞駸蔑一言知其為人子於
遜之亦云

黃花候秋節遠自夏小正坤裳有正色鞠衣亦令名一
從人偽勝遂與天力爭易性寓非族改顏隨所令新奇
既易售粹駁宜相傾疾惡逢伯厚識真似淵明君言我
所印世論誰敢評願君為霜風一掃紫與頰

月令季秋之月鞠有黃花夏小正大戴禮篇名以蟲魚
草木正十二月之節候起於夏后氏故曰夏小正周易

坤六五黃裳元吉周禮內司服掌王后之六服褱衣揄狄闕狄鞠衣展衣緣衣素沙鄭注鞠衣黃衣也後漢陳蕃傳疾惡如風朱伯厚屢見陶淵明飲酒詩秋菊有佳色裛露掇其英維摩經佛所印可屢見

和趙德麟送陳傳道

二陳既妙士兩歐惟德人王孫乃龍種世有箭雲麟五君從我游傾寫出怪珍俗物敗人意茲得實清醇那知有聚散佳夢失欠伸我舟下清淮沙水吹玉塵君行踏曉月疎木挂寸銀尚寄別後詩翦刻淮南春

莊子德人者居無思行無慮漢賈誼鵬賦德人無累知命不憂二陳言傳道履常兩歐言叔弼季默也杜子美

哀王孫詩高帝子孫盡隆準龍種自與常人殊
箭雲字出漢書天馬歌已見晉王戎傳戎與阮籍為竹林游戎
嘗後至籍曰俗物已復來敗人意戎笑曰卿輩意亦復
易敗耳清淮時先生將離潁赴揚州故云幽怪錄橋中
兩叟相謂曰汝輸我瀛洲玉塵九斛

施註蘇詩卷三十一

欽定四庫全書薈要卷一萬四千九百八十三

集部

施註蘇詩卷三十二

宋 蘇軾 撰

宋 施元之 註

武進邵長蘅刪補

詩三十六首

起在潁州洎元祐壬申改知揚州尋以兵部尚書召還作

上巳日與二子迨過遊塗山荆山記所見

塗山詳見

三卷濠州
七絕詩注

此生終安歸還軫天下半竭來乘櫟廟復作微禹歎自

注昔自南河赴杭州從祠及彼呱公自注山有啟廟像設偶此過此蓋二十二年矣

祭

公自注謂塗山氏

秦祖當侑坐

公自注廟有柏翳

夏郊亦薦裸

公自注有

廟可憐淮海人尚記弧矢旦

公自注淮南人謂禹以六月六日生是日數萬人會

山上雖傳記不荆山碧相照楚水清可亂則人有餘坑載然相傳如此

美石肖溫瓚

公自注荆山下有卞氏採玉坑石色如玉不受鑲刻取出山下輒變色不復溫瑩

龜泉木杪出牛乳石池漫

公自注龜泉在荆山下色白而甘真陸羽所謂石池漫流

者有石記云唐貞元中隨白龜流出

小兒強好古侍史笑流汗歸時蝙蝠

飛炬火記遠岸

國語還軫諸侯可謂家困尚書禹曰予乘四載孔氏傳
云水乘舟陸乘車泥乘楫山乘櫟左傳昭元年天王使
劉定公勞趙孟於潁館於洛汭劉子曰美哉禹功明德
遠矣微禹吾其魚乎尚書禹曰予創若時娶於塗山辛
壬癸甲啟呱呱而泣予弗子惟荒度土功楚詞招魂像
設君室靜閒安些詩國風今夕何夕見此祭者史記秦
本紀秦之先帝顓頊氏之苗裔孫曰女修女修生大業
大業生大費與禹平水土是為柏翳舜賜姓嬴氏禮記
夏后氏禘黃帝而郊鯀尚書亂於河韓詩外傳楚人卞
和得玉璞於荆山獻之武王使人相之曰非也王怒則
其左足及文王即位又獻之玉人又曰石也刖其右足
至成王時和抱其璞哭於荆山下王乃使玉人理之得
寶焉名曰和氏璧蘅按圖經塗山在昔鍾離縣西九十
五里荆山在縣西八十三里二山本相聯屬而淮水遠
荆山之背神禹鑿開使水流二山間此濠州之荆山也
又按史記楚始封居丹陽至楚文王遷都郢皆在南郡

其地有荆山楚人故以荆為號左傳曰昔我先王熊繹
辟在荆山後漢郡國志曰臨沮侯國有荆山注引荊州
記云谿北即荊山首曰景山即下和抱璞之處據此則
下和得璞自當以近郢之荆山為是而濠州古鍾離國
去郢甚遠韓非子所載下和獻玉事乃在武文成三王
之際當時鍾離未嘗屬楚下和何從得至此山今山中
有採玉坑為後人傳會無疑明宋漁
塗荆二山記亦云附著之以俟博雅

淮上早發

澹月傾雲曉角哀小風吹水碧鱗開此生定向江湖老
默數淮中十往來

次韻徐仲車

公自注仲車耳聾按仲車名積山
陽人苦學養母盡力行年四十不

婚不仕久之鄉人迫令就舉入京則以隻輪
載母躬自推行葛衫草屨行道之人不能辨
也登治平四年第未調官母亡遂不復仕家
居山陽衣食不給及路振通判楚州始為娶
妻生子小名路兒云先生嘗言仲車古之獨
行人於陵仲子不能過然其詩文則怪而放
如玉川子此一反也耳贖甚畫地為字乃始
通終日面壁不與人接而四方事無不周知
此二反也昔王肅三反而
斯人有其二亦可謂異矣

惡衣惡食詩愈好恰是霜松轉春鳥蒼蠅莫亂遠雞聲

世上誰知

一作如

公覺早八年看我走三州

公自注元豐八年予赴登

州元祐四年赴杭州
今赴揚州皆見仲車

月自當空水自流人間擾擾真螻

螳應笑人呼作鬪牛

次韻林子中春日新堤書事見寄

林子中名希事見二十九

卷次韻林子中蒜山亭見寄詩按先生以元祐六年三月從杭州召還凡七上章馬去八月自翰林承旨出知潁州故詩云東都寄食似浮雲襍被真成一宿賓七年正月改知揚州子中繼公守杭公在杭開西湖以所積葑為長堤子中因杭人之意為榜曰蘇公堤新堤書事蓋蘓公堤也

東都寄食似浮雲襍被真成一宿賓收得玉堂揮翰手
卻為淮月弄舟人羨君湖上齋搖碧笑我花時甌有塵

為報年來殺風景連江夢雨不知春

公自注來詩有芍藥春之句揚州近

歲率為此會用花千餘萬枝吏緣為姦民極病之故罷此會

晉魏舒傳襍被而出莊子天運篇仁義先王之蘧廬也止可一宿而不可久處李義山雜纂有十三殺風景事

送陳伯修察院赴闕

陳伯修名師錫神宗時登第奏名帝得其文屢讀屢

賞顧侍臣曰此必陳師錫也啟封果然擢為第三人故云聞君射策日妙語發疇咨知臨安縣拜監察御史以言事出知宿遷縣元祐間東坡三上章薦之乃入為校書郎遷工部郎歲宗用為殿中侍御史坐黨論削官郴州卒

裕陵固天縱筆有雲漢姿嘗重連山象不數秋風辭龍

騰與虎變狸豹復何施我窮真有數文字乃見知聞君
射策日妙語發疇咨一日喧萬口驚倒同舍兒豈知二
十年道路猶遲遲苦言如藥石瞑眩終見思屈信反覆
手獨於君可疑四門方穆穆行矣及此時

神宗皇帝葬裕陵周禮太卜堂三易之法一曰連山唐
藝文志易部有連山十卷漢武帝幸河東祠后土與羣
臣飲燕乃自作秋風辭揚
子狸變則豹豹變則虎

送張嘉父長官

張嘉父名大寧山陽人登元豐八年第治春秋學政和間為司

勲郎張文潛嘗作南山賦以贈之其畧曰南山巖巖兮其下有人珮玉而握珠尅意魯叟

之古經不習世儒之臆書過都梁芳躊躇奉
兩月之周旋其所居當是泗之南山今為盱
眙也

都城昔傾蓋駿馬初服輶再見江湖間秋鷹已離鞬於
今三會合每進不少留豫章既可識瑚璉誰當收微官
有民社妙割無雞牛歸來我益敬器博用自周百年子
初筵我已迫旅酬但當寄苦語高節貫白頭

說文輶車輶也考工記輶人為輶有國馬之輶有田馬
之輶有駑馬之輶又張衡賦云馬倚輶而徘徊杜子美
去矣行君不見溝上鷹一飽即飛擊詩小雅
賓之初筵左右秩秩又鍾鼓既設舉醕逸逸

在潁州與德麟同治西湖未成改揚州三月十六日湖成德麟有詩見懷次其韻

太山秋毫兩無窮鉅細本出相形中大千起滅一塵裏
未覺杭潁誰雌雄

公自注來詩云與杭爭雄

我在錢塘拓湖淥大堤

士女爭昌丰六橋橫絕天漢上北山始與南屏通忽驚
二十五萬丈老葑席卷蒼雲空竭來潁尾弄秋色一水
縈帶昭靈宮坐思吳越不可到借君月斧修腫臃二十
四橋亦何有換此十頃玻瓈風雷塘水乾禾黍滿寶釵

耕出餘鸞龍明年詩客來弔古伴我霜夜號秋蟲

公自注德

麟見約來揚寄居
亦有 Intent 求揚倅

莊子齊物論天下莫大於秋毫之末而太山為小樂府
有大堤曲云朝發襄陽城暮至大堤宿大堤諸女兒花
豔驚郎目詩國風子之昌兮又子之丰兮子由作先生
墓誌杭州西湖南北三十里環湖往來終日不達先生
在杭乃取葑積之湖中為長堤一以通南北六橋並跨
堤上又先生奏修杭州西湖狀云自國初以來稍廢不
治水涸草生漸成葑田熙寧中湖之葑合者蓋十二三
爾至今遂塞其半已打量湖上葑田計二十五萬餘丈
度用二十餘萬工先生昭靈侯廟碑南陽張公隋之初
家潁上曰我龍也自唐景龍以來潁人世祠之於焦氏
臺熙寧中詔封公昭靈侯元祐六年乃益治其廟月斧
用鄭仁表遊嵩山事再見歐陽公自揚移潁作西湖詩

云都將二十四橋月換得西湖十頃秋先生復自潁移揚此句蓋用文忠語也雷塘在揚州東北十里煬帝葬處

次韻德麟西湖新成見懷絕句

壺中春色飲中仙

公自注謂洞庭春色也

騎鶴東來獨惘然猶有

趙陳同李郭不妨同泛過湖船

杜子美有飲中八仙歌後漢郭太傳遊洛陽見李膺大奇之後歸鄉里衣冠諸儒送至河上車數千兩林宗惟與膺同舟而濟衆賓望之以為神仙太字林宗

再次韻德麟新開西湖

使君不用山鞠窮饑民自逃泥水中欲將百瀆起凶歲

公自注予以潁人苦饑奏乞留黃河夫萬人免使甌石
修境內溝洫詔許之因以餘力浚治此河

愁揚雄西湖雖小亦西子縈流作態清而丰千夫餘力
起三閘焦陂下與長淮通十年憔悴塵土窟清瀾一洗
啼痕空王孫本自有仙骨平生宿衛明光宮一行作吏
人不識正似雲月初朦朧時臨此水照冰雪莫遣白髮
生秋風定須卻致兩黃鵠新與上帝開濯龍湖成君歸
侍帝側燈花已綴釵頭蟲

左傳杜預注麥麴鞠窮所以禦濕欲使無社逃泥水中
詳已見漢揚雄傳家無觀石之儲晏如也嵇叔夜與山
巨源絕交書遊山澤觀魚鳥心甚樂之一行作吏此事
便廢後漢許揚傳成帝時翟方進奏毀鴻郤陂太守鄧
晨欲修復聞揚善水脉召與議之揚曰昔成帝用方進
之言尋而自夢上天天帝怒曰何故敗我濯龍淵是後
民失其利黃鵠注再見韓退之燈花詩囊裏排
金粟釵頭綴玉蟲更煩將喜事來報主人翁

到官病勸未嘗會客毛正仲惠茶乃以端午小
集石塔戲作一詩為謝

我生亦何須一飽萬想滅胡為設方丈養此膚寸舌爾
來又衰病過午食輒噎繆為淮海帥每愧厨傳闕爨無

欲清人奉使免內熱空煩赤泥印遠致紫玉玦為君伐
羔豚歌舞菰黍節禪牕麗午景蜀井出冰雪坐客皆可
人鼎器手自絜金釵候湯眼魚蟹亦應訣遂令色香味
一日備三絕報君不虛受知我非輕啜

漢宣帝紀吏飾厨傳稱過使客韋昭曰厨謂飲食傳謂
傳舍莊子人間世吾食也執麤而不臧爨無欲清之人
今吾朝受命而夕飲冰我其內熱與劉禹錫試茶詩何
况蒙山顧渚春白泥赤印走風塵周處風土記仲夏端
午進筒糴一名角黍以菰葉裹黏米以象陰陽相包蜀
井揚州石塔寺旁有蜀井相傳云泉脈與蜀相通故紙
工汲其水以造麻牋杜子美蜀道圖詩吳蜀水相通三
國蜀費禪傳來敏曰君信可人必能辦賊陸羽茶經茶

沸如魚眼崔珣詩
石鼎水煎紅蟹眼

雙石

并引

至揚州獲二石其一綠色岡巒迤邐有穴達於背
其一玉白可鑒漬以盆水置几案間忽憶在潁州
日夢人請住一官府榜曰仇池覺而誦杜子美詩
曰萬古仇池穴潛通小有天乃戲作小詩為僚友
一笑

夢時良是覺時非汲井埋盆故自癡但見玉峰橫太白

便從鳥道絕峨眉秋風與作煙雲意曉日令涵草木姿
一點空明是何處老人真欲住仇池

韓退之益池詩老翁真箇似童兒汲井埋盆作小池唐
地理志鳳翔府郿縣有太白山茅君內傳三十六洞第
二委羽之洞名曰大有空明之天三秦記仇池縣本名
仇維山上有池故曰仇池山在倉洛二谷之間形如覆
壺仇池百頃周迴九千四十步天形四方壁立千仞自
然樓櫓凡二十一道可攀援而上見後漢南蠻傳注

次韻鼂無咎學士相迎

無咎名補之濟州鉅野人文章溫潤典縟其凌

厲奇卓出於天成與黃張秦並驅聯鑣世號元祐四學士

少年獨識鼂新城閉門卻掃卷旆旌胸中自有談天口

坐卻秦軍發墨守有子不為謀置錐虹霓吞吐忘寒饑
端如太史牛馬走嚴徐不敢連尻雕褻回未用疑相待
枉尺知君有家戒避人聊復去瀛洲伴我真能老淮海
夢中仇池千仞巖便欲攬我青霞幘且須還家與婦計
我本歸路連西南老人飲酒無人佐獨看紅藥傾白墮
每到平山憶醉翁懸知他日君思我路傍小兒笑相逢
齊歌萬事轉頭空賴有風流賢別駕猶堪十里卷春風
鼂新城無咎之父也為新城令晉葛洪傳閉門卻掃未
嘗交遊左太冲詠史吾慕魯仲連談笑卻秦軍後漢鄭

玄傳何休好公羊學遂著公羊墨守左氏膏肓殺梁廢
疾玄乃發墨守鍼膏肓起廢疾休見而歎曰康成入吾
室操吾矛以伐我乎玄字康成荀子儒者無置錐之地
莊子雜篇堯舜有天下子孫無置錐之地也東方朔傳
武帝問朔曰方今公孫丞相兒大夫董仲舒司馬遷之
倫先生自視何與比哉朔曰臣觀其吐吻連尻靡臣
雖不肖尚魚此數子唐褚亮傳太宗為天策上將軍作
文學館收聘賢才以杜如晦等為學士凡分三番遞宿
閣下每暇日訪以政事詩論典籍號為十八學士是時
在選中者天下慕向謂之登瀛洲史記滑稽傳楚莊王
欲以優孟為相優孟曰請歸與婦計之再見杜子美仇
池詩近接西南境長懷十九泉謝玄暉直中書省詩紅
藥當階翻蒼苔依砌上白墮注詳上卷次韻趙德麟詩
平山堂在揚州大明寺歐陽文忠公修建杜牧之詩春
風十里揚州路捲上
珠簾總不如三見

次韻范淳父送秦少章

宿緣在江海世網如予何西來庾公塵已濯長淮波十
年淮海人初見一麥禾但欣爭訟少未覺舟車多秦郎
忽過我賦詩如卷阿句法本黃子

公自注謂魯直也

二豪與措

磨

公自注謂其兄少遊與張文潛也

嗟我久離羣逝將老西河後生多

名士欲薦空悲歌小范真可人獨肯勤收羅瘦馬識驂

耳枯桐得雲和近聞館李生

公自注謂李薦方叔

病鶴借一柯贈

行苦說我妙語慰蹉跎西羌已解仇烽火連朝那坐籌

付公等吾將寄潛沱

史記仲尼弟子傳孔子既沒子夏居西河教授為魏文侯師周禮孤竹之管雲和之琴瑟冬日至於地上之圜丘奏之漢趙充國傳元康三年先零與諸羌種豪二百餘人解仇交質詛盟漢地理志安定郡朝那縣故戎那邑也漢高祖紀運籌帷幄之中決勝千里之外吾不如子房尚書九江孔殷沱潛既道孔氏云沱江別名潛水名

聞林夫當徙靈隱寺寓居戲作靈隱前一首

唐

字林夫事見二十九卷和
唐彦猷詩送其子垌詩注

靈隱前天竺後兩澗春淙一靈鷲不知水從何處來跳

波赴壑如奔雷無情有意兩莫測
冒向冷泉亭下相縈
回我在錢塘六百日山中暫來不暖席
今君欲作靈隱
居葛衣草屨隨僧蔬能與冷泉作主
一百日不用二十
四考書中書

圖經杭州靈山之陰北澗之陽即靈隱寺靈山之南南
澗之陽即天竺寺二澗流水號錢源泉遠寺峰南北而
下至峰前合為一澗有橋號合澗橋又冷泉亭在飛來
峰下白樂天冷泉亭記東南山水餘杭郡為最就郡言
靈隱為尤由寺觀冷泉亭為甲亭在山下水中央寺西
南隅白樂天詩到郡六百日八山十二回唐郭子儀傳
校中書令
考二十四

滕達道挽辭二首

滕達道名甫字元發宣仁簾聽避高魯王遵甫諱遂以字

名而以達道為字也元發東陽人廷試第三
早受知於范文正公而孫威敏汚一見異之
曰奇材也後當為賢將授以治劇守邊之畧
同修起居注英宗書姓名藏禁中未及用神
宗知之即位擢御史中丞翰林學士尹開封
故曰先帝知公早云云未幾與先生皆以論
新法得罪而拳拳憂國之意若一故曰公方
占賈鵬云云先生自黃移汝上書乞居常州
即日報可遂與元發會於金山蓋其來守吳
興時也後以手帖與賈耘老云久放江湖不
見偉人昨在金山滕元發以扁舟破巨浪出
船巍然使人神聳故曰荆溪欲歸老浮玉偶
同遊云云皆
紀其實也

先帝知公早虛懷第一人至今詩禮將惟數武宣臣材
大雖難用時來亦少信高平風烈在威敏典刑新空試
乘邊策寧留相漢身淒涼舊部曲淚濕塚前麟

左傳僖二十七年晉作三軍謀元帥趙衰曰郤穀可亟
聞其言矣說禮樂而敦詩書詩書義之府也禮樂德之
則也德義利之本也君其試之乃使郤穀將中軍漢公
孫弘傳贊上方欲用文武求之如弗及漢之得人於茲
為盛蓋指孝武以及孝宣之世也漢高祖紀興關中卒
乘邊塞李奇曰乘守也漢王商傳河平四年單于來朝
丞相商坐未央廷中單于仰視商貌大畏之天子聞而
嘆曰此真漢相矣杜子美詩韋賢初相漢續漢書百官
志將軍領軍皆有部曲杜子美詩淒涼餘部曲又詩苑邊高塚卧麒麟

雲夢連江雨，樊山落木秋。公方占賈鵬，我正買龔牛。共
有江湖樂，俱懷畎畝憂。荆溪欲歸老，浮玉偶同遊。骯髒
儀刑在，驚呼歲月遒。回頭雜歌哭，挽語不成謳。

譙周法訓挽歌者，高帝召田橫至尸鄉自殺，從者不敢哭而不勝哀，故為此歌以寄哀音焉。

次韻蘓伯固遊蜀岡送李孝博奉使嶺表

新苗未沒鶴，老葉方翳蟬。綠渠浸麻水，白板燒松煙。笑
窺有紅頰，醉卧皆華顛。家家機杼鳴，樹樹梨棗懸。野無
佩犢子，府有騎鶴仙。觀風嶠南使，出相山東賢。渡江弔

狼石過嶺酌貪泉與君步徙倚望彼修連娟願及南枝
謝早隨北鴈翩歸來春酒熟共看山櫻然

韓退之稻畦詩魚肥知己秀鶴沒覺初深晉顧愷之傳
桓玄嘗以一柳葉結愷之曰此蟬所翳葉也取以自蔽
人不見已庾信小園賦蟬有翳芳不驚白樂天詩畫屏
扁白板漢趙充國傳贊秦漢以來山東山相山西出將
狼石在京口注已見晉吳隱之傳廣州石門有水曰貪
泉隱之為刺史至泉所酌而飲之因賦詩曰若使夷齊
飲終當不易心楚辭妒修眉之連娟漢外戚李夫人
傳美連娟以修嫵沈約詩野棠開未落山櫻發欲然

石塔寺

并引

世傳王播飯後鐘詩蓋揚州石塔寺事也相傳如

此戲作此詩

饑眼望東西詩腸忘早晏雖知燈是火不悟鐘非飯山
僧異漂母但可供一莞胡為二十年記憶作此訕齋厨
養若人無益祇遺患乃知飯後鐘闍黎蓋具眼

撫言王播少孤嘗客揚州惠照寺木蘭院隨僧粥食久
之僧頗厭一日播出道未回而先飯訖乃鳴鐘魚後播
鎮江都因訪舊遊所題字皆紗罩之因留詩云云按唐
書播相穆宗時權倖競進播賴其力至宰相專務將迎
居位無所裨益復失河北衆望不厭故
公詩有無益祇遺患闍黎蓋具眼之句

送鼂美叔發運右司年兄赴闕

我年二十無朋儔當時四海一子由君來扣門如有求

頎然鶴骨清而修醉翁遣我從子游翁如退之蹈軻丘

尚欲放子出一頭

公自注嘉祐初與子由寓興國浴室美叔忽見訪云吾從歐陽公遊久矣

公令我來與子定交謂子必名世老夫亦須放他出一頭地按子由志先生墓亦云酒醒夢斷四

十秋病鶴不病骨愈蚪惟有我顏老可羞醉翁賓客散

九州幾人白髮還相收我如懷祖拙自謀正作尚書已

過優君求會稽實良籌往看萬壑爭交流

公自注美叔方乞越

毛詩碩人其頎注頎長也白樂天詩病瘦形如鶴晉王羲之傳嘗謂賓友曰懷祖正當作尚書耳更求會稽便

自邈然王
迷字懷祖

王文玉挽辭

才名誰似廣文寒，月斧雲斤琢肺肝。
玄晏一生都卧病，子雲三世不遷官。
幽蘭空覺香風在，宿草何曾淚葉乾。
猶喜諸郎有曹志，文章還復富波瀾。

晉書皇甫謐自號玄晏先生，終身稱疾，辭位。孟郊贈崔
純亮詩：鏡破不改光，蘭死不改香。禮記：曾子曰：「朋友之
墓，有宿草而不哭焉。」說者謂草經一年則陳，根今翻用
之以言過期而猶哭也。三國魏陳思王傳：小子志保家
之主也。按曹志蓋陳思王植之孽子，亦好學有才。

送芝上人遊廬山

二年閱三州我老不自惜團團如磨牛步步踏陳迹豈
知世外人長與魚鳥逸老芝如雲月炯炯時一出比年
三見之常苦有所適逝將走廬阜計濶道愈密吾生如
寄耳出處誰能必江南千萬峰何處訪子室

先生以元祐六年離杭召為翰林承旨是年
又出守潁州七年徙揚州故云二年閱三州

送程德林赴真州

君為縣令元豐中吏貪功利以病農君欲言之路無從

移書諫臣以自通

公自注諫臣
蹇受之也

元豐天子為改容我時

匹馬江西東問之逆旅言頗同老人愛君如劉寵小兒

敬君如魯恭爾來明目達四聰收拾駟駿冀北空君為

赤令有古風政聲直入明光宮天廐如海養羣龍并收

其子豈不公

公自注君之子祁舉制
策文學行義為時所稱

白沙何必煩此翁

後漢劉寵傳為會稽太守徵還山陰有五六老叟龐眉
皓髮人齎百錢以送寵寵勞之曰父老何自苦對曰自

明府下車以來狗不夜吠民不見吏年老遭值聖明今
聞見棄去故自扶奉送魯恭傳為中年令河南尹袁安

遣仁恕掾肥親往廉察政迹恭與俱坐桑下有堆過止
其旁旁有小兒親曰何不捕之兒曰堆方將離親瞿然

起曰蝗不犯境一異也化及鳥獸二異也豎子有仁心
三異也還府以狀白安魏都賦冀馬填廐而駟駿韓退
之送溫造序伯樂一過冀北之野而
馬羣遂空白沙真州也唐為白沙鎮

谷林堂

深谷下窈窕高林合扶疎美哉新堂成及此秋風初我
來適過雨物至如娛予稚竹真可人霜節已專車老槐
苦無賴風花欲填渠山鴉爭呼號谿蟬獨清虛寄懷勞
生外得句幽夢餘古今正自同歲月何必書

國語禹致羣臣於會稽之山防風氏後至殺
而戮之骨節專車杜子美詩書時記朝夕

予少年頗知種松手植數萬株皆中梁柱矣都
梁山中見杜輿秀才求學其法戲贈二首

露宿泥行草棘中十年春雨養髯龍如今尺五城南杜
欲問東坡學種松

雞跖集韋曲杜鄼近長安諺曰城南韋杜去
天尺五杜子美贈韋七詩時論同歸尺五天

君方掃雪收松子我已開榛得茯苓為問何如插楊柳
明年飛絮作浮萍

先生次韻章質夫楊花詞曉來雨過遺蹤何在一
池萍碎注云舊說楊花入水為浮萍驗之信然

行宿泗間見徐州張天驥次舊韻

二年三躡過淮舟款段還逢馬少游無事不妨長好飲
著書自要且窮愁孤松早偃原非病倦鳥雖還豈是休
更欲河邊幾來往祇今霜雪已蒙頭

酉陽雜俎世傳松千歲方傾平偃蓋然有數年輒偃但
於根下遇石則偃耳遯齋閒覽蕪伯才云凡欲偃松栽
時去松中大根惟留四傍須根則無不
偃陶淵明歸去來詞鳥倦飛而知還

次韻劉景文贈傅義秀才

幼眇文章宜和寡崢嶸肝肺亦交難未能飛瓦彈清角

甬便投泥戲滌寒忽見秋風吹洛水遙知霜葉滿長安
詩成送與劉夫子莫遣孫郎帳下看

幼眇字出漢書讀曰要妙屢見韓子衛靈公之晉平公
觴之靈公乃召師涓坐師曠之傍援琴鼓之未終師曠
曰不如清徵平公請試聽之一奏有玄鶴二八來集再
奏而成列三奏而延頸鳴音中宮商師曠曰不如清角
一奏之有雲從西北方來再奏之大風至大雨隨之裂
帷幙俎豆墮廊瓦唐張說傳始武后末年為滌寒胡戲
中宗嘗乘樓縱觀至是四夷來朝復為之說上疏曰乞
寒滌胡未聞典故裸體跳足汨泥揮水盛德何觀焉呂
洞賓詞西風吹渭水落葉滿長安撫言賈島得落葉滿
長安一句求作一聯杳不可得孫郎帳下用禰正平語
屢見

在彭城日與定國為九日黃樓之會今復以是
日相遇於宋凡十五年憂樂出處有不可勝言
者而定國學道有得百念灰冷而顏益壯顧予
衰病心形俱瘁感之作詩

菊盞萸囊自古傳長房寧復是臞仙應從漢武橫汾日
數到劉公戲馬年對玉山人今老矣見恒河性故依然
王郎九日詩千首今賦黃樓第二篇

吳筠續齊諧記費長房謂桓景曰九月九日汝家當有
災患急令家人縫絳囊盛茱萸繫臂上登高飲菊花酒

可消此禍漢武帝秋風辭泛樓船芳濟汾河橫中流兮
揚素波南史宋武帝在彭城九月九日遊項羽戲馬臺
再見世說山公謂嵇叔夜之為人也巖巖若孤松之獨
立其醉也隗然若玉山之將頽楞嚴經佛告波斯國王
言我今示汝不生滅性汝年幾時見恒河水王言我生
三歲經過此流爾時即知是恒河水佛言如汝所說日
月歲時念念變遷則汝三歲見此河時王年十三其水
云何王言如三歲時宛然無異乃至於今年六十二亦
無有異

九日次定國韻

朝菌無晦朔蟪蛄疑春秋南柯已一世我眠未轉頭仙
人視吾曹何異蜂蟻稠不知蠻觸氏自有兩國憂我觀

去來今未始一念留奔馳竟何得而起無窮羞王郎誤
涉世屢獻久不醕黃金散行樂清詩出窮愁俛仰四十
年始知此生浮軒裳陳道路往往兒童收封侯起大第
或是君家騶似聞負販人中有第一流炯然徑寸珠藏
此百結裘意行無車馬倏忽畧九州邂逅獨見之天與
非人謀笑我方醉夢衣冠戲沐猴力盡病騏驥伎窮老
伶優北山有雲根寸田自可耰會當無何鄉同作逍遙
遊歸來城郭是空有纍纍丘

莊子逍遙遊朝菌不知晦朔蟪蛄不知春秋此小年也
李太白將進酒歌天生我材必有用黃金散盡行復來
烹羊宰牛且為樂會須一飲三百杯世說桓大司馬問
劉真長曰聞會稽王語奇進爾耶對曰極進然是第二
流中人桓曰第一流是誰劉曰正在我輩逸士傳董威
隱居洛陽白社以殘絮縷帛為衣號百結衣楞嚴經譬
如有人於自衣中繫如意寶珠不自知覺漢伍被傳漢
廷公卿列侯皆如沐猴而冠耳蓋寬饒傳長信少傳以
列卿而沐猴舞又見項羽傳莊子逍遙遊何不樹之無
何有之鄉廣莫之野彷徨乎無為其側丁令威歌城郭
如故人民非何不
學仙塚累累屢見

召還至都門先寄子由

老身倦馬河堤永踏盡黃榆綠槐影荒鷄號月未三更

客夢還家時一頃歸老江湖無歲月未填溝壑猶朝請
黃門殿中春事罷詔許來迎先出省已飛青蓋在河梁
定餉黃封兼賜茗遠來無物可相贈一味豐年說淮潁

異聞實錄江南進士陳季卿客長安十年不歸一日終
南山翁以竹葉置寰瀛圖上渭水中令陳注目恍然至
家信宿復回山翁尚擁褐而坐季卿謝曰豈非夢耶翁
曰他日自知之經月家人來訪具述所以而留詩皆在
漢汲黯傳曰臣自以為填溝壑不復見陛下不意陛下
復收之漢吳王濞傳不能朝請二十餘年注云漢律春
曰朝秋曰請如古諸侯朝聘也唐百官志開元年改
門下省曰黃門按子由時為門下侍郎故事執政聽謁
有服親仍先上聞得旨乃出青蓋
按國朝故事宰相執政許張青蓋

次韻定國見寄

還朝如夢中雙闕眩金碧復穿鴛鷺行強寄麋鹿迹勞
生苦晝短展轉不能夕默坐數更鼓流水夜自逆故人
為我謀此志何由畢越吟知聽否誰念病莊舄公自注
時方請
越

史記陳軫傳軫對秦惠王曰越人莊舄仕楚執珪有頃
而病楚王曰舄故越之鄙細人也今仕楚執珪富貴矣
亦思越不中謝對曰凡人之思故在其病也彼思越則
越聲不思越則楚聲使人往聽之猶尚越聲也今臣雖
棄遯之楚豈
能無秦聲哉

次韻蔣穎叔錢穆父從駕景靈宮二首

歸來病鶴記城闌舊踏松枝雨露新半白不羞垂領髮

軟紅猶戀屬車塵

公自注前輩戲語有西湖風月不如東華軟紅香土

雨收九陌

豐登後日麗三元下降辰麤識君王為民意不才何以

助精裡

潘安仁秋興賦素髮蜚以垂領杜子美詩鬢毛垂領白尚書裡於六宗孔安國曰精意以享謂之裡按年譜元祐七年壬申是歲南郊先生為鹵簿使

與君並直記初元白首還同入禁門玉殿齊班容小語

霜廷稽首泣微溫

公自注適與穆父並拜庭中地皆流濕相與小語道之

病貪賜

茗浮銅葉老怯秋泉灩寶樽回首鷗行有人傑坐知羌

鹵是遊魂

周禮大祝辨九摯一曰稽首銅葉言茶盞也魏文帝善哉行假氣遊魂魚鳥為伍杜子美詩今日看天意遊魂

貸爾曹

近以月石硯屏獻子功中書公復以涵星硯獻

純父侍講子功有詩純父未也復以月石風林

屏贈之謹和子功詩并求純父數句

紫潭出玄雲翳我潭中星獨有潭上月倒挂紫翠屏我
老不看書默坐養此昏花睛時時一開眼見此雲月眼
自明久知世界一泡影大小真偽何足評笑彼三子歐
梅蘇無事自作雪羽爭

公自注事見
三人詩集

故將屏硯送兩范

要使珠璧栖牕櫺大范忽長謠語出月脇令人驚小范
當繼之說破星心如鷄鳴牀頭復一月下有風林橫急
送小范家護此涵星泓願從少陵博一句山木盡與洪
濤傾

後漢列女蔡琰傳玄雲合兮翳月星異聞寶錄徐玄之
夜見人物如粟粒行案上傳呼曰虬蟬王欲觀漁於紫
石潭漁具數十人入硯中皆獲小魚玄之大駭以冊覆
之照看皆無雪羽用孟子字前漢天文志日月如合璧
五星如連珠月脇用皇甫湜若穿天心出月脇語已見
孟郊聞雜詩似聞孤月口能說落星心杜子美山水圖
歌舟人漁子入浦漱
山木盡亞洪濤風

次韻范純父涵星硯月石風林屏詩

月次於房歷三星斗牛不神箕獨靈簸搖桑榆盡西靡
影落蘓子硯與屏天工與我兩厭事孰居無事為此形
與君持橐侍帷幄同到溫室觀堯蓂自憐太史牛馬走

伎等卜祝均倡伶欲留衣冠挂神武便擊雲水歸南溟
陶泓不稱管城沐醉石可助平泉醒故持二物與夫子
欲使妙質留天庭但令滋液到枯槁勿遣光景生晦冥
上書挂名豈待我獨立自可當雷霆我時醉眠風林下
夜與漁火同青熒撫物懷人應獨歎作詩寄子誰當聽

韓退之三星行我生之辰月宿南斗箕獨有神靈無時
停簸揚三星各在天什五東西陳嗟汝牛與斗汝獨不
能神劉孝標書冀東平之樹望咸陽而西靡淮南子曰
西垂景在桑端謂之桑榆莊子天運篇孰居無事推而
行是帝王世記堯時有草當階而生每月朔日生一莢
至月半則生十五莢自十六日後日落一莢至月而盡

月小則餘一莢不落此瑞草也謂之蓂莢司馬遷報任
安書太史公牛馬走司馬遷再拜言僕之先人非有剖
符丹書之功文史星歷近乎卜祝之間固主上所戲弄
倡優畜之韓退之毛穎傳封諸管城號管城子陳玄陶
泓褚先生友善相推致出處必偕舊唐書李德裕傳平
泉別墅有醒酒石德裕醉則踞之又歸登傳登拜右拾
遺時德宗欲相裴延齡補闕熊執易危言忤旨草成
以示登登曰願寄一名雷霆之下安忍令足下獨當

次韻錢穆父會飲

按先生論新法出為杭州通判時年三十六歷典三郡謫

徙黃州年五十始再登朝二聖眷遇特異諸
公懼其得政交攻之既不自安力丐外出守
杭州凡再歲召入而子由已為右丞公以嫌
又上章丐去遂守願移揚復召入益不為留
計元祐初錢穆父與公同在西掖又同去守
杭越至是復同來故云與君幾合散先生任

兵部為閻曹穆父任戶部為劇部故
云居官不任事又主人獨賢勞云云

彈冠恨不蚤挂冠常苦遲盛服每假寐角闕時伏思東
門未祖道西山空拄頤逝將江海去安此麋鹿姿要當

謀三徑何暇擇一枝與君幾合散得酒忘醇醑君談似

落屑我飲如奕碁

公自注世有作詩如奕碁奕碁如飲酒飲酒乃大戒之語僕於碁酒二事

俱不能也


居官不任事造物真見私主人獨賢勞金穀方流

馳行人亦結束杖杜乃歸期公卿雖少安河流正東颺

我得會稽去方回良不癡

左傳宣公二年晨往寢門闢矣盛服將朝坐而假寐王
注角闕言帝闕之角也漢文紀未央宮東闕罽罽災師
古曰罽罽謂連闕曲閣也釋名罽罽在闕門外罽復也
臣將入議事至此復重思莊子逍遙遊鷦鷯巢於深林
不過一枝晉史胡毋輔之字彥國王澄曰彥國吐佳言
如鋸木屑霏霏不絕漢溝洫志禹以為河所從來者高
水湍悍難以行平地數為敗迺鑿二渠以引其河注云
鑿分也晉却愔傳字方回遷太常固讓不拜樂補遠郡
出為會稽內史久之
乞骸骨因居會稽

施註蘇詩卷三十二



總校官庶吉士 臣張能照

校對官編修 臣楊壽楠

膳錄監生 臣趙由青

膳錄監生 臣王泰雲

欽定四庫全書薈要

集部

施註蘇詩卷三十三
四

詳校官助教臣常循



欽定四庫全書薈要卷一萬四千九百八十四

集部

施註蘇詩卷三十三

宋 蘇軾 撰

宋 施元之 註

武進邵長衡刪補

詩四十一首

起在兵部汨遷
禮部尚書作

次韻穆父尚書侍祠郊丘瞻望天光退而相慶

引滿醉吟

千章杞梓蔭雲天
樗散誰收老鄭虔
喜氣到君浮白裏

豐年及我挂冠前令嚴鐘鼓三更月野宿貔貅萬竈煙
太息何人知帝力歸來金帛看顏肩

杜子美送鄭虔貶台州司戶鄭公樗散鬢成絲酒後常
稱老畫師史記孫子傳使齊軍入魏地為十萬竈明日
為五萬竈又明日為二萬竈韓
退之城南聯句刈熟擔肩顏

郊祀慶成詩

元祐七年哲宗合祭天地于圜丘
公以兵部尚書為南郊鹵簿使先

是朝饗入室至神宗室上涕洟不止癸巳冬
至行禮上致誠極恭夜月澄爽雲物晏溫御
樓肆赦終日和煥天意昭答翼日風寒相屬
時雪如期宰執侍從進詩以賀蓋此詩也

帝出乘昌運天心予太平文章三代繼制作七年成大

祀乾坤合剛辰日月明泰壇朝掃地魄寶夜垂精仰御
圓蒼蓋環觀海嶽城北流吞朔易西極落欒槍升燎靈
光答回鑒瑞霧迎需雲徧枯槁解雨達勾萌可頌非天
德因箴亦下情民言知有酌帝謂本無聲富國由崇儉
斯年在好生無心斯格物克己自銷兵化國安新政孤
臣反舊耕還將清廟什留與野人賡

周易帝出乎震漢食貨志三登曰太平漢孝武紀贊曰
號令文章煥然可述後嗣得遵鴻業有三代之風尚書
洛誥註周公七年成禮樂禮記成王幼弱周公踐天子
之位以治天下朝諸侯於明堂制禮作樂頒度量而天

下服七年致政於成王禮記外事以剛日鄭氏曰順其
出為陽也出郊為外事爾雅圓丘泰壇祭天也方澤泰
圻祭地也禮記掃地而祭貴質也晉天文志鉤陳口中
一星曰天皇大帝其神曰耀魄寶唐文粹李德裕武宗
冊文云振金石而六變魄寶昭臨詩國風北流活活詩
意言黃河順流也尚書平在朔易孔安國云北稱朔易
謂歲改易於北方西極謂西夏也漢天文志天槍左右
銳長數丈縮西北天橈本類星末銳長數丈石氏云槍
橈棊彗異狀其殃一也又曰祆星周易雲上於天需君
子以飲食晏樂又解卦天地解而雷雨作雷雨作而百
果草木皆甲坼解之時義大矣哉禮記季春之月生氣
方盛陽氣發泄勾者畢出萌者盡達唐李絳傳安國佛
祠欲使絳為之頌絳言大人與天地合德謂非文字所
能盡若令可述是陛下美有分限毛詩庭燎美宣王也
因以歲之禮記坊記上酌民言則下天上施詩大雅帝
謂文王予懷明德又上天之載無聲無臭後漢王符傳

化國之日舒以長故其民間暇
而力有餘毛詩清廟祀文王也

次韻奉和錢穆父蔣穎叔王仲至四首

見和西湖月下聽琴

謾謾松下風藹藹隴上雲聊將竊比我不堪持寄君半
生寓軒冕一笑當琴尊良辰飲文字晤語無由醺我有
鳳鳴枝背作蛇蚶紋月明委靜照心清得奇聞當呼玉
澗手公自注家有雷琴甚奇古玉澗道人崔閑妙于雅聲當呼使彈一洗羯鼓昏請歌
南風曲猶作虞書渾

王注鳳鳴枝琴也琴古而漆裂則有蛇蚺紋蚺字出
莊子注謂蛇腹下有齟齬可以行也羯鼓錄明皇酷不
好琴嘗聽琴未及畢吹琴者出曰速召花奴將羯鼓來
為我解穢史記樂書舜作五絃之琴以歌南風揚子虞
夏之書
渾渾爾

見和仇池

上窮非想亦非非下與風輪共一癡翠羽若知牛有角
空瓶何必井之眉還朝暫接鸛鸞翼謝病行收麋鹿姿
記取和詩三益友他年弭節過仇池

華嚴經四空處天無邊處天無所有處天非想非非想
處天又金輪水際外有風輪樓炭經地深二十億萬里

下有金粟金剛亦各二十億萬里下有水際八十億萬里此雖六重前四是地輪第五水輪第六風輪共一癡言上天下地皆然蓋佛氏謂之界者一癡想所成也白樂天詩上自非想頂下及風水輪杜子美赤霄行孔雀未知牛有角渴飲寒泉逢抵觸赤霄玄圃須往來翠尾金華不辭辱漢陳遵傳揚雄作酒客難法度士曰子猶瓶矣觀餅之居居井之肩處高臨深動常近危唐上官儀曰御史供奉亦墀下接武夔龍遙羽鷄鶩三益友指言錢蔣王也仇池詳見三十二卷雙石詩注

玉津園

承平苑囿雜耕桑六聖勤民計慮長碧水東流還舊派

公自注玉津分蔡河上流復合於下

紫壇南峙表連岡不逢遲日鶯花亂

空想疎林雪月光千畝何時躬帝籍斜陽寂歷鎖雲莊

六聖謂太祖太宗真宗仁宗英宗神宗漢郊祀志甘泉
泰時紫壇八觚宣通象八方禮記天子籍田千畝以事

地天

籍田

竊脂方紀瑞布穀未催耕魚沫依蘋渚蝸涎上綵楹江
湖來夢寐衰筇負平生琴裏思歸曲因君一再行

左傳昭十七年少皞摯之立也鳳鳥適至故紀於鳥為
鳥師而鳥名九扈為農正杜預曰桑扈竊脂也文選石

季倫有思歸
引序注已見

頃年楊康功使高麗還奏乞立海神廟于板橋
僕嫌其地湫隘移書使遷之文登因古廟而新
之楊竟不從不知定國何從見此書作詩稱道

不已僕不能記其云何也次韻答之

楊康功名景略洛陽

人元豐間以起居郎使高麗為國王祭奠使
歸稱上旨就賜金紫擢中書舍人終龍圖閣

待制知

揚州

退之仙人也游戲於斯文談笑出奇偉鼓舞南海神
頃年三韓使幾為鮫鰐吞歸來築祠宇要使百賈奔

公自注板

橋商賈所聚

我欲遷其廟下數浮空羣

公自注謂登州海市

移書竟不

從信非磊落人公胡為拳拳繫此空中雲作詩頌其美

何異刻劍痕我今已括囊象在六四坤

韓退之南海神廟碑海於天地間為物最鉅而南海神次最貴在北東西三神河伯之上號為祝融傳燈錄南泉云汝道空中一片雲為復釘釘住為復藤纜著刻劍出呂氏春秋詳二十二卷王仲父哀辭注周易坤之六四曰括囊無咎無譽

沐浴啟聖僧舍與趙德麟邂逅

趙德麟名令時舊字景貺事見

三十卷先生守潁德麟在幕府郡有西湖每相從其上至是官滿入京故有東潁西湖季

子來歸之句時先生力求
會稽故有同泛越溪之句

南山北關兩非真東潁西湖迹已陳
季子來歸初可喜
老聃新沐定非人酒清不醉休休暖睡穩如禪
息息勻
自笑塵勞餘一念明年同泛越谿春

孟浩然詩北關休上書南山歸敝廬春秋閏元年八月
季子來歸穀梁傳其曰季子貴之也其曰來歸喜之也
莊子田子方孔子見老聃老聃新沐方將被髮而乾熱
然似非人注熱不動兒神仙傳焦先卧于雪下氣息休
休如盛暑
醉卧之狀

次韻王仲至喜雪御筵

元祐七年南郊罷時雪
如期先生是歲自揚州

召歸故云偶還仗內身如寄
仲至名欽臣時權工部侍郎

三軍喜氣鑠飛花睡起空驚月在沙未集驂騑金轡裏
故殘鳩鵲玉橫斜偶還仗內身如寄尚憶江南酒可賒
宣勸不多心自醉強扶衰白拜君嘉

杜子美宣政退朝詩雪殘鳩鵲亦多時唐儀衛志衛凡
朝會之仗二衛番上分為五仗一曰供奉仗二曰親仗
三曰勳仗四曰翊仗五曰散手仗每月以四十六人立
內廊閣外號曰內仗以左右金吾將軍當上中郎將一
人押之朝罷皇帝步入東序門然後放仗後漢劉寬傳
帝嘗令講經寬于坐被酒睡伏帝問太尉醉耶對曰任
重責大憂心如醉左傳襄四年晉侯享魯穆叔歌
鹿鳴之三穆叔曰君所以嘉寡君也敢不拜嘉

僕所藏仇池石希代之寶也王晉卿以小詩借
觀意在於奪不敢不借然以此詩先之

海石來珠宮秀色如蛾綠坡陀尺寸間宛轉陵巒足連

娟二華頂空洞三茅腹初疑仇池化又恐瀛洲感殷勤

嶠南使餽餉淮東牧公自注僕在揚州程德孺自
嶺南解官還以此石見遺得之

喜無寐與汝交不瀆盛以高麗盆藉以文登玉公自注
僕以高

麗所餉大銅盆貯之又以登
州海石如碎王者附其足幽光先五夜冷氣壓三伏

老人生如寄茅舍久未卜一夫幸可致千里常相逐風

流貴公子竄謫武當谷見山應已厭何事奪所欲欲留
嗟趙弱寧許負秦曲傳觀慎勿許間道歸應速

楚詞紫貝闕方珠宮再見南部新書青黛螺光明鮮翠
每一螺直千金當時名之曰蛾綠漢舊儀中黃門持五
夜謂自甲夜至戊夜也唐地理志均州武當郡有武當
山九域志武當山一名仙室山山上有巖澗凡三十七
所趙弱四句用史記蘭
相如歸璧事詳已見

次天字韻答岑巖起

岑巖起名象求梓州人元祐四年為郎考功用蘓文

定公薦拜殿中侍御史文定執政以嫌徙金部郎事徽宗於王邸終寶文閣待制第四卷

送岑著作作詩
即巖起也

一聲清蹕霧開天百辟心莊豈貌虔回顧驚君珠玉側
同升愧我粃糠前裴回月色留壇影縹緲松香泛蠟煙
公自注近制以椽燭松明易執盆莫嘆郎潛生白髮聖朝求舊鄙鳶肩
周禮卿士大祭祀帥其屬夾道而蹕漢儀注皇帝輦動
稱警出殿則傳蹕晉衛玠傳王濟歎曰珠玉在側覺我
形穢孫綽傳與習鑿齒共行綽在前顧謂習曰沙之汰
之瓦礫在後習曰簸之揚之糠粃在前後漢張衡傳尉
廐眉而郎潛鳶肩用唐馬周事竝已見

次韻蔣穎叔二首

扈從景靈宮

道人幽夢曉初還已覺笙簫下月壇風伯前驅清宿霧
祝融參乘破朝寒英姿連壁從多士妙句鏘金和八鑾

已向詞臣得頗牧

公自注時潁叔新除熙河帥

路人莫作老儒看

楚辭遠遊風伯為余先驅兮辟氛埃而清涼漢司馬相
如傳大人賦祝融警而蹕御子虛賦陽子參乘璾阿為
御韓退之荆潭唱和詩序鏗鏘發金石世說孫興公作
天台山賦成以示范榮期云卿試擲地要作金石聲詩
小雅四牡彭彭八鸞鏘鏘唐畢誠傳為翰林學士宣宗
召訪邊事誠條狀甚悉帝悅曰吾將擇能帥者孰謂頗
牧在吾禁署卿為朕行
乎即拜邠寧節度使

凝祥池

似知金馬客時夢碧雞坊冰雪消殘臘煙波寫故鄉鳴

鸞自容與立馬久回翔乞與三韓使新圖到樂浪

公自注時

高麗使在都下每至勝景輒圖畫以歸

碧雞坊在成都杜子美詩云時出碧雞坊西郊向草堂
漢地理志樂浪郡武帝元封三年開故朝鮮國也圖畫
見聞志高麗國熙寧甲寅歲遣使金良鑒入貢訪中國
圖畫銳意購求稍精者十無一二然猶費三萬餘緡丙
辰冬復遣使崔思訓入貢因將帶畫工數人乞摹寫相
國寺壁畫歸國詔許之於是畫摹之持歸其畫人頗有
精于筆法者

和叔盜畫馬

天驥德力備馬外龍鱗中皇天不遣言兀與圖畫

一作畫圖

同駕駘飽官粟未受一洗空十駕均一至何事簫雲風

南秦錄呂光討西域平上疏曰惟龜茲據三十六國之中入其國城天驥龍鱗腰裏丹髦萬計盈廐元微之望雲騅歌色沮聲悲仰天訴天不遣言君未識杜子美丹青引斯須九重真龍出一洗萬古凡馬空荀子驥一日而千里駕馬十駕亦及之矣
簫雲字出漢禮樂志屢見

王晉卿示詩欲奪海石錢穆父王仲至蔣穎叔

皆次韻穆至二公以為不可許獨穎叔不然今

日穎叔見訪親睹此石之妙遂悔前語僕以謂

晉卿豈可終閉不予者若能以韓幹二散馬易
之者蓋可許也復次前韻

相如有家山縹緲在眉綠誰云千里還寄此一顰足平
生錦繡腸蚤歲藜莧腹從教四壁空未遣兩峰感吾今
況衰病義不忘樵牧逝將仇池石歸沂岷山瀆守子不
貪寶完我無瑕玉故人詩相戒妙語予所伏一篇獨異
論三占從兩卜君家畫可數天驥紛相逐風駿掠原野
電尾梢澗谷君如許相易是亦我所欲今朝安西守來

聽陽關曲勸我留此峰他日來不速

西京雜記文君眉色不加黛常如遠山再見李白翰林集序太白弟令問嘗目白曰兄心肝五臟皆錦繡耶韓退之詩三年國子師腸肚習藜莧左傳襄十五年子罕曰我以不貪為寶爾以玉為寶不若人有其寶尚書三人占則從二人之言柳子厚龍城錄寧王善畫馬六馬滾塵圖明皇最愛玉面花驄謂無纖悉不備風駿霧鬣信偉如也唐書地理志洮州臨洮郡有府一名安西

欲以石易畫晉卿難之穆父欲兼取二物穎叔欲焚畫碎石乃復次前韻并解二詩之意

春冰無真堅霜葉失故綠鸚疑鵬萬里竄笑夔一足二

豪爭攘袂先生一捧腹明鏡既無臺浮瓶何用感盆山
不可隱畫馬無由牧聊將置庭宇何必棄溝瀆焚寶真
愛寶碎玉未忘玉久知公子賢出語耆年伏欲觀轉物
妙故以求馬卜維摩既復捨天女還相逐授之無盡燈
照此久幽谷定心無一物法樂勝五欲三義吾鄉里萬
馬君部曲卧雲行歸休破賊看神速

公自注晉卿將種常有此意

莊子秋水篇夔謂蚘吾以一足踰蹕而行子無如矣今子之使萬足獨奈何蚘曰予動吾天機而不知其所以然晉劉伶傳嘗醉與俗人相忤其人攘袂奮臂而往伶徐曰雞肋不足以安尊拳傳燈錄神秀云心如明鏡臺

六祖云明鏡亦無臺又百丈召為山云為山勝景汝當
居之華林曰某甲忝居上首祐公何得住持百丈曰若
能下得一句出格當與住持即指淨餅問云不得喚做
淨瓶華林曰不可喚作木樨也百丈又問祐師師踢倒
淨餅百丈笑云輸卻山子也楞嚴經衆生皆轉於物若
能轉物即同如來維摩經魔波旬言居士可捨此女以
一切所有於彼者是為菩薩維摩言我已捨矣汝便將
去於是諸女問維摩我等云何止於魔宮居士乃言諸
姊有法門名無盡燈無盡燈者譬如一燈然百千燈冥
者皆明明終不盡又互見六卷上元詩注傳燈錄六祖
偈云本來無一物維摩經汝等已發道意有法樂可以
自娛法華經堅著於五欲癡愛故生惱因造立宅舍五
娛欲自

生日蒙劉景文以古畫松鶴為壽且貺佳篇次

韻為謝

問子一室間寧有千里廓塵心洗長松遠意發孤鶴生
朝得此壽死籍疑可落微言在參同妙契藏九籥故人
有奇趣逸想寄幽壑霜枝謝寒暑雲翮無前卻何須構
明堂未羨巢阿閣緬懷別時語復作數日惡詩腴固堪
食字瘦還可愕高標忽在眼清夢了如昨君今噲等伍
志與湛輩各豈待相願言方為不朽託子雲老執戟長
孺終主爵吾當追松喬子亦鄙衛霍

抱朴子小餌丹法服之二日司命削其死籍李太白詩
北鄴落死名南斗上生籍白樂天詩授我參同契其辭
妙且微神仙傳魏伯陽齊會稽上虞人也得古文龍虎
上經畫獲妙旨公因約其象著參同契三卷鮑昭升天
行五圖發金記九禽隱丹經注云仙家有九轉金丹法
而禽所以藏書也白樂天松詩殺身獲其所為君構明
堂軒后本紀鳳集東園梧桐又巢阿閣南齊王儉傳世
祖嘗問當今誰能為五言詩儉曰謝朓得父膏腴晉羊
祜傳從事鄒湛曰公令聞令望必與此山俱傳至若湛
輩乃當如公言月五詳十七卷與王郎昆仲詩注漢汲
黯傳字長孺武帝
召為主爵都尉

程德孺惠海中柏石兼辱佳篇輒復和謝

程德孺名

之元持節嶺南歸惠此石故皆
用嶺南事德孺時為主客郎中

嵐薰瘴染卻敷腴笑飲貪泉獨繼吳未欲連車收薏苡
肯教沈網取珊瑚不知庾嶺三年別收得曹溪一滴無
但指庭前雙柏石要予臨老識方壺

飲貪泉晉吳隱之事薏苡後漢馬援事竝已見洽閒記
籀錄國海中珊瑚生于水底以大船鐵網取之名其所
為珊瑚洲南越志南越以五嶠為限東曰大庾九域志
大庾嶺本屬虔州大庾縣淳化三年以縣置南安軍傳
燈錄僧問雲門如何是曹溪一滴水再見又趙州從諗
禪師凡有僧入室但指庭前柏樹云庭前柏樹子拾遺
記海中有三山其形如壺方丈曰
方壺蓬萊曰蓬壺瀛洲曰瀛壺

次秦少游韻贈姚安世

帝城如海欲尋難肯捨漁舟到杏壇剝啄扣君容膝戶
巍峩笑我切雲冠問羊獨怪初平在牧豕應同德曜看
肯把參同較同異小牕相對為研丹

莊子漁父篇孔子休乎杏壇之上絃歌鼓琴奏曲未半
漁父下船而來楚辭九章冠切雲之崔巍問羊黃初平
事詳見十四卷送將官梁左藏詩注後漢梁鴻傳牧
豕於上林苑中娶同縣孟氏女字之曰德曜孟光

次丹元姚先生韻

葉少蘊避暑錄記姚丹元事
云姚因王鞏以進於東坡本

京師富人王氏子為父逐去事建隆觀一道
士天資頗慧因取道藏徧讀或能成誦又多
得其方術丹藥作詩間有放浪奇譎語故能
成其說浮沉淮南屢易姓名後復其姓名為

王繹又易名元誠力
詆林靈素為其毒死

浮生知幾何僅熟一金羹那於俯仰間用此委曲情自
憐無他腸偶亦得此生懸知當去客中有不亡存但恐
俗緣重每為習氣昏似聞梅子真近在吳市門未能肩
拍洪但欲目擊溫不敢扣門呼恐作踰垣奔且令紹介
先徐以方便論不學劉更生黃金鑄尚方不學房次律
身事問潁陽王烈亦何人叔夜未可量獨見神山開遽
食石髓香至道尚聽瑩麤材終蹶張先生喜而笑幅巾

登我堂苦誓指黃壤要言刻青琅蓬萊在何許弱水空
相望且當從嵇阮聊復數山王達人友四海曲士守一
疆慎勿使形謀兒童驚夜光

漢書衛綰傳以戲車為郎文帝以為廉謹實無他腸以
為河間王太傅陶淵明雜詩身為逆旅舍我如當去客
莊子田子方吾有不亡者存韓退之華山女詩仙梯難
攀俗緣重楞嚴經陀那微細識習氣成暴流漢梅福字
子真變姓名為吳市門卒詳見九卷次韻陳海州注郭
景純游仙詩左挹浮丘袖右拍洪崖肩莊子田子方溫
伯雪子舍於魯仲尼見之而不言子路問之仲尼曰若
夫人者目擊而道存矣不可以容聲矣維摩經維摩詰
以方便現身有疾廣為說法法華經以方便力柔伏其
心漢楚元王傳向字子政本名更生尚方鑄作事詳十

二卷贈王仲素寺丞詩注西陽雜俎邢和璞善心算作
穎陽書疏房琯太尉祈問終身之事邢言若由東南止
西北祿命卒矣降魄之處非館非寺非塗署病起於魚
殮木材用龜茲板其後房公舍閬州紫極宮見有治龜
茲板者始憶邢之言有頃刺史具鱠邀琯琯悟具以板
事白於刺史其夕病鱠卒也王烈石髓事屢見嵇康字
叔夜聽瑩字出莊子齊物論已見漢申屠嘉傳以材官
蹶張從高帝擊項羽晉王羲之傳去會稽郡於父母墳
前自誓朝廷以其誓苦亦不復徵之本草玉石部青琅
玕注瑠璃之類火齊寶也續仙傳謝自然曰每登玉霄
峰即見滄海蓬萊亦應不遠於是入海遇一道士笑謂
曰蓬萊隔弱水此去三萬里非飛仙莫到又互見前莊
子列禦寇內誠不解形謀成光以外鎮人心使人輕乎
貴老而整其所患注整猶醺釀也韓退之詩兒童畏雷
電魚驚夜光

次韻秦少游王仲至元日立春三首

省事天公厭兩回
新年春日併相催
殷勤更下山陰雪
要與梅花作伴來

己卯嘉辰壽阿同

公自注子由一字同叔
元日己卯渠本命也

願渠無過亦

無功
明年春日江湖上
回首觚稜一夢中

詞鋒雖作楚騷寒
德意還同漢詔寬
好遣秦郎供帖子

盡驅春色入毫端

公自注立春日翰
林學士供詩帖子

上元侍飲樓上三首呈同列

澹月疎星遶建章仙風吹下御爐香侍臣鵠立通明觀

一作殿
一朵紅雲捧玉皇

薄雪初銷野未耕賣薪買酒看升平吾君勤儉倡優拙
自是豐年有笑聲

史記范雎傳楚之鐵劍利而倡優拙夫鐵劍利則士勇倡優拙則思慮遠

老病行穿萬馬羣九衢人散月紛紛歸來一盞殘燈在

猶有傳柑遺細君

公自注侍飲樓上則貴戚爭以黃柑遺近臣謂之傳柑聽攜以歸蓋故事

也

漢東方朔傳歸遺
細君又何仁也

送蔣穎叔帥熙河

并引 蔣穎叔名之
奇已見二十四卷

穎叔出使臨洮與穆父仲至同餞之各賦詩一篇
以今我來思為韻致適歸之意得我字

西方猶宿師論將不及我苟無深入計緩帶我亦可承
明正須君文字粲藻火自薦雖云數留行終不果正坐
喜論兵臨老付邊瑣新詩出談笑僚友困掀簸我欲歌
秋杜楊柳方婀娜邊風事首鹵所得蓋么麼願為魯連

書一射聊城竒陰功在不殺結草酬魏顥

漢韓安國傳孝文寤於兵之不可宿也故復和親之約
顏師古注宿久留也晉羊祜傳祜在軍輕裘緩帶尚書
藻火粉米黼黻絺繡以五采彰施於五色作服漢丙吉
傳鹵入雲中代郡吉召東曹案邊長吏瑣科條其人詩
小雅杜杜勞還役也又采薇昔我往矣楊柳依依漢衛
青傳至龍城斬首鹵數百史記魯仲連傳齊田單攻聊
城不下仲連為書約之矢以射城中遺燕將燕將見書
泣三日乃自殺聊城亂田單遂屠聊城說文竒箭莖也
魏顥事出左傳宣十五年詳見
卷四送蔡冠卿知饒州詩注

再送二首

使君九萬擊鵬鷃肯為陽關一斷魂不用寬心九千里

安西都護國西門

唐地理志安西大都護府初治西州正觀中置漢書鄭吉初護鄯善以西南道既破車師降日逐威震西域遂并護車師以西北道故號都護自吉始焉

餘刃西屠橫海鯢應予詩識是游魂歸來趁別陶弘景看挂衣冠神武門

莊子養生主其於游刃必有餘地矣木玄虛海賦其魚則橫海之鯨游魂公先有詩與頴叔云須知羌鹵是游魂故申言之而曰詩識也漢賈誼傳識言其度注識驗也有徵驗之書也陶弘景詩意公自謂也

次韻頴叔觀燈

安西老守是禪僧到處應然無盡燈永夜出游從萬騎
諸羌入看擁千層便因行樂令投甲不用防秋更打冰
振旅歸來還侍宴十分宣勸恐難勝

魏武紀賊將見公悉於馬上拜秦胡觀者前後重沓唐
陸贄傳西北邊歲調河南江淮兵謂之防秋毛詩伐鼓
淵淵振旅闐闐

次韻王晉卿奉詔押高麗燕射

北苑傳呼陞楯郎東夷初識令君香天山自可三箭取
海國何勞一葦航宣勸不辭金盃側醉歸爭看玉鞭長

錦囊詩草勤收拾莫遣雞林得夜光

陞楯郎出史記滑稽傳再見世說荀令君至人家坐處
三日香唐書薛仁貴傳為鐵勒道行軍總管時九姓衆
十餘萬令驍騎來挑戰仁貴發三矢輒殺三人軍中歌
曰將軍三箭定天山壯士長歌入漠關九姓遂衰李賀
傳每旦出從小奚奴背古錦囊遇所得投囊中未嘗先
立題然後為詩白居易傳最工詩當時士人爭傳雞林
行賈售其國相率易一
金偽者相輒能辨之

次韻錢穆父王仲至同賞田曹梅花

四朝正史
錢穆父傳

戴其復知開封臨事益精明東坡乘其据案
時遺之詩穆父操筆立賦以報坡曰電掃廷
訟響答詩筒近所未見也然穆父以是歲二
月十八日再除開封田曹賞梅倡和猶當是

為戶部尚書時此後止有次韻穆父馬上寄
蔣穎叔二絕而東坡出帥定武和送別一詩
爾響答詩簡顧未見之豈倡酬猶
有遺逸耶坡公之語不應虛發也

寒廳不知春獨立耿玉雪閉門愁永夜置酒及明發忽
驚庭戶曉未受煙雨沒浮光風宛轉照影水方折鬢霜
未易掃眉斧真自伐惟當此花前醉卧黃昏月

淮南子水圓折者有珠方折者有玉
枚叔七發皓齒蛾眉命曰伐性之斧

送襄陽從事李友諒歸錢塘

李友諒字叔益錢塘人舉進士紹聖

初右正言張商英論元祐以來刑賞失當謂
友諒當衝替因與蘓軾厚善三省為之掩匿

云

居杭積五歲自意本杭人故山歸無家欲卜西湖鄰良
田不難買靜士誰當親髯張既超然老潛亦絕倫李子
冰玉姿文行兩清淳歸從三人游便足了此身公隄不
改作姥嶺行開新幽夢隨子去松花落衣巾

王注髯張老潛李子皆杭州人髯張不知為誰老潛即
道潛師曰參寥子者李子則友諒也公堤即蘓公堤姥
嶺則天姥山也

次韻吳傳正枯木歌

吳傳正名安詩父克相神
宗傳正元祐中為右司諫

與劉器之同攻蔡確竄荒服遷左史攝西掖
坐草蕪黃門知汝州詞溢美罷去後為子累
編置湘中詩中有龍眠居士本詩人指李伯時也

天公水墨自奇絕瘦竹枯松寫殘月夢回疎影在東牕
驚怪霜枝連夜發生成變壞一彈指乃知造物初無物
古來畫師非俗士妙想實與詩同出龍眠居士本詩人
能使龍池飛霹靂君雖不作丹青手詩眼亦自工識拔
龍眠胸中有千驕不獨畫肉兼畫骨但當與作少陵詩
或自與君拈秃筆東南山水相招呼萬象入我摩尼珠

盡將書畫散朋友獨與長缺歸來乎

卓異記天授二年十二月則天幸上苑遣使宣詔曰明
朝遊上苑火急報春知花須連夜發莫待曉風吹凌晨
名花瑞草布苑而開楊嚴經度百千劫猶如彈指杜子
美曹將軍畫馬圖詩曾貌先帝照夜白龍池十日飛霹
靂又丹青引幹惟畫肉不畫骨又韋偃畫馬歌戲拈充
筆掃驂驪欲見騏驎出東壁圓覺經清淨摩尼寶珠映
於五色隨方各現

送黃師是赴兩浙憲

二十二卷有泗州除夜雪中黃師是送酥酒詩黃師

是名實神宗時登進士第歷京東河北轉運
師是為章子厚之甥子由官陳師是二女皆
為子由婦哲宗欲召用而林希用是沮之終
寶文閣待制知定州贈龍圖閣直學士孫勰

跋此詩云先生侍兒嘗問朝之諸公遷擢不淹時獨黃師是昔為提刑今又提刑何也先生時方作詩送之故有白首沉下吏綠衣有公言之句按陸游序亦云侍妾朝雲嘗嘆黃師是仕不進故此句之意戲言其上僭云

世久無此士我晚得王孫寧非叔度家豈出次公門白
首沈下吏綠衣有公言哀哉吳越人久為江湖吞官自
倒帑廩飽不及黎元近聞海上港漸出水底村願君五
袴手招此半菽魂一見刺史天稍忘獄吏尊會稽入吾
手鏡湖小於盆比我東來時無憂瘡痍存

後漢徵君黃憲字叔度西漢循吏黃霸字次公五袴後漢廉范事屢見漢項籍傳今歲饑民貧卒食半菽後漢蘓章傳為冀州刺史故人為清河太守章行部請太守陳平生之好太守喜曰人皆有一天我獨有二天漢周勃傳下廷尉既出曰吾嘗將百萬軍安知獄吏之貴也會稽句先生時方請越故云

送范中濟經畧侍郎分韻賦詩得先字且贈以

魚枕杯四馬箠一以元戎十乘以先啟行為韻

范中濟字子奇五世祖仁恕相蜀因葬成都祖雍字伯仁始家河南中濟以蔭歷官判將作監使契丹敵欲撓之不為屈歷四路漕左司司農卿由河陽守召權戶部侍郎元祐八年二月為集賢殿修撰知慶州伯仁在仁宗時為副樞李元昊叛拜鎮武節度使知延州

又知永興軍故云廟堂選世將范氏真多賢
中濟在慶進寶文閣待制廣儲蓄城柵嚴守
備羈點羌推誠待下人樂為用
入為吏部侍郎以待制致仕

梁李久樂禍自焚豈非天兩鼠鬪穴中一勝亦偶然謀
初要百慮善後乃萬全廟堂選世將范氏真多賢仁風
被宿麥綠浪搖秦川號令聳毛羽先聲落虛弦我家天
一方去路城西偏投竿困障日賣劍行歸田贈君荊魚
杯副以蜀馬鞭一醉可以起母令祖生先

梁李謂西夏二種族西夏在唐賜姓李為李繼遷本朝
賜姓趙為趙元昊承襲者姓趙其餘種族猶李姓梁則

其妻之黨也左傳莊二十年王子頽歌舞不倦樂禍也
又隱四年魯大夫衆仲曰兵猶火也弗戢將自焚史記
趙奢傳秦伐韓軍於閼與奢曰其道遠險狹譬猶兩鼠
鬪於穴中將勇者勝後漢安帝紀詔以宿麥不收賑賜
貧人注宿舊也麥必經年而熟故稱宿落虛弦用戰國
策更羸射鴈事再見歐陽公送劉侍讀詩酌君以荊州
魚枕之蕉贈君以宣城鼠須之筆杜牧之送冀處士詩
贈以蜀馬箠副之胡罽裘晉劉琨傳與祖逖為友聞祖
逖被用曰吾枕戈待旦
常恐祖生先吾著鞭

書晁說之考牧圖後

我昔在田間但知羊與牛
川平牛背穩如駕百斛舟
舟行無人岸自移我卧讀書牛不知
前有百尾羊聽我鞭

聲如鼓鼙我鞭不妄發視其後者而鞭之澤中草木長
草長病牛羊尋山跨坑谷騰趲筋骨強煙簑雨笠長林
下老去而今空見畫世間馬耳射東風悔不長作多牛
翁

圓覺經雲駛月運舟行岸移唐李密傳以蒲羈乘牛挂
漢書一帙角上行且讀神仙傳王方平牽蔡經鞭之曰
吾鞭亦不可妄得也莊子達生篇善養生者若牧羊視
其後者而鞭之杜子美詩老去人間空見畫李白寒食
獨酌詩世人聞此皆掉
頭有如東風射馬耳

呂與叔學士挽詞

呂與叔名大臨京兆藍田人
博學無所不通尤深於春秋

二禮每欲掇拾三代遺文舊制令今可行不為空言以拂世駭俗元祐間從官薦其行義修飭文詞爾雅除太學博士遷祕書省正字范內翰淳甫乞以備勸講未及用而卒兄大忠字進伯終寶文閣直學士大防字微仲為左僕射兄弟平居相切磋論道考禮制度冠婚喪祭一本於古關

中言禮學者推呂氏

言中謀猷行中經關西人物數清英欲過叔度留終日未識魯山空此生論議凋零三益友功名分付二難兄老來尚有憂時歎此涕無從何處傾

後漢黃憲傳字叔度荀淑遇憲於逆旅與語移日不能去世說郭林宗至汝南造袁奉高車不停軌鑒不輟輒

詣黃叔度乃彌日信宿唐元德秀傳字紫芝蘓源明嘗
語人曰吾不幸生此衰俗所不恥者識元紫芝也嘗為
魯山令天下高其行謂之元魯山再見世說陳元方子
長文季方子孝光各論其父功德爭之不決白於太丘
太丘曰元方難為兄季方難為弟禮記孔子遇舊館人
之喪入而哭之遇一哀而出涕子貢曰無乃已重乎子
曰子惡夫涕之無從也

丹元子示詩飄飄然有謫仙風氣吳傳正繼作
復次其韻

飛仙亦偶然脫命瞬息中惟詩不可擬如寫天日容夢
中哦七言玉丹已入懷一語遭綽虐失身墮蓬萊蓬萊

至今空護短不養才上界足官府謫仙應退休可憐吳
與蘇骭髀雪滿頭雪滿頭終當卻與丹元子笑指東海
乘桴浮

楞嚴經衆生堅固草木而不息藥道圓成名飛行仙
韓退之記夢詩壯非少者哦七言六字常語一字難我
以指撮白玉丹行且咀嚙行詰盤口前截斷第二句綽
唐顧我顏不歡乃知仙人未賢聖護短憑愚邀我敬

次韻王定國書丹元子寧極齋

仙人與吾輩寓迹同一塵何曾五漿餽但有爭席人寧
極無常居此齋自隨身人那識郗鑒天不留封倫誤落

世網中俗物愁我神先生忽扣戶夜呼祁孔賓便欲隨
子去著書未絕麟願挂神虎一作武冠往卜飲馬鄰王郎
濯紈綺意與陋巷親南游苦不蚤僮及蓴鱸新

莊子列禦寇吾嘗食於十漿而五漿先饋寓言篇其往
也舍者避席場者避竈其反也舍者與之爭席矣繕性
篇不當時命而大窮乎天下則深根寧極而待此存身
之道也唐紀聞譚武威段碧天寶五載過魏郡逆旅有
客市藥碧知是道者即市醪薦之自言吾姓孟名期思
居在恒山碧祈至山中遂約入山居五日孟先生曰今
日盍謁老先生於是啟西室老先生據牀碧謁拜焉碧
在山四年見老先生出戶不過五六度但端坐正心禪
觀不食每出禪時即飲少藥汁碧問孟叟老先生為誰
叟取晉書却鑒傳吟讀之曰欲識先生即鑒也杜牧之

題魏文貞詩可憐貞觀太平後天且不留封德彝封倫
字德彝再見晉初嘉字孔賓事詳十八卷石芝詩注左
傳哀十四年春西狩獲麟杜預曰仲尼傷周道之不興
感嘉瑞之無應故因魯春秋而修中興之教絕筆於獲
麟之一句所感而作故所以為終也挂冠
陶弘景事屢見神虎門避唐諱改神武

王仲至侍郎見惠穉枯種之禮曹北垣下今百
餘日矣蔚然有生意喜而作詩

翠枯東南美近生神嶽陰惜哉不可致霜根絡雲岑仙
風振高標香實隕平林偶隨樗櫟生不為樵牧侵忽驚
黃茅嶺稍出青玉鉞好事雖力取王城少知音豈無損

鵝手但知覓來禽高懷獨夫子一見捐橐金得之喜不
寐贈我意殊深公堂開後閤凡木媿華簪栽培一寸根
寄子百年心常思樊籠中摧我鸞鶴衿誰知積雨後寒
芒曉森森恨我迫歸老不見汝十尋蒼皮護玉骨旦莫
視古今何人風雨夜卧聽饑龍吟

換鵝來禽用王羲之事屢見莊子千
歲而一遇大聖是猶旦莫遇之也

施註蘓詩卷三十三